



**AWIG - AWIG DESA ADAT
ANJINGAN
PERBEKEL DESA GETAKAN KECAMATAN BANJARANGKAN
KABUPATEN KLUNGKUNG**



**KASURAT OLIH
KRAMA DESA ADAT ANJINGAN
TH. 1986**



SUSUNAN PANITIA PENULISAN AWIG-AWIG DESA ADAT ANJINGAN

1. Pembina :
 1. Kepala Desa Getakan
 2. B P P L A Kecamatan
 3. Team BPPLA Kabupaten

2. Ketua Umum : I Nengah Puspa, BA
 - Ketua I (Pakraman) : Drs. Wayan Sinuartha
 - Ketua II (Agama) : Wayan Sriorti
 - Ketua III (Pawongan) : I DW. Putu Iken

3. Sekretaris Umum : I Ketut Roden
 - Sekretaris I (Pakraman) : Wayan Daging
 - Sekretaris II (Agama) : I DW. KT. Alit Yusa BA
 - Sekretaris III (Pawongan) : Ngakan Made Sari

4. Bendahara I : Nyoman Murti
Bendahara II : Nengah Komen

5. Pembantu umum I : Drs. Sang KT Warka
Pembantu umum II : Wayan Suparka

6. Seksi – Seksi/Anggota :
 - A. Sukerta Tata Pakraman :
 1. Ketua : Drs. Wayan Sinuartha
 2. Sekretaris : Wayan Daging
 3. Anggota : Pan Sarni
 4. Anggota : Pan Suartama
 5. Anggota : Pan Sudarma
 6. Anggota : Pan Putu Partami
 7. Anggota : Wayan Kamar
 8. Anggota : Pan Srinah
 9. Anggota : Wayan Kicen
 - B. Sukerta Tata Agama :
 1. Ketua : Wayan Sriorti
 2. Sekretaris : I DW. KT. Alit Yusa. BA
 3. Anggota : Nengah Komen
 4. Anggota : Pan Suama
 5. Anggota : DW. Aji Mangku
 6. Anggota : Sang Pekak Mangku
 7. Anggota : Ajin Dsk. Pt. Geriya
 8. Anggota : Pan Gede Sumartana
 9. Anggota : Pan Diarti
 - C. Sukerta Tata Pakraman
 1. Ketua : I DW. PT. Iken
 2. Sekretaris : Ngakan Made Sari
 3. Anggota : Pan Sudiani
 4. Anggota : Pan Nuaja
 5. Anggota : Pan Luh Parwati
 6. Anggota : Sang Guru Warni
 7. Anggota : Ajin Dsk. PT. Kartini
 8. Anggota : Pan Surata
 9. Anggota : Pan Sritamin

DAGING AWIG-AWIG DESA ADAT ANJINGAN

Halaman

MURDHA – CITTA	i
SARGA : I. ARAN LAN WEWIDANGAN DESA	1
SARGA : II. PETITIS LAN PAMIKUKUH	1 - 2
SARGA : III. SUKERTHA TATA PAKRAMAN :	
Palet : 1. Indik Krama Lan Warga Desa.....	2 - 10
Palet : 2. Indik Prajuru.....	10 - 15
Palet : 3. Indik Peparuman	15 - 17
Palet : 4. Indik Kulkul.....	17 - 18
Palet : 5 Indik Druwen Desa.....	18 - 19
Palet : 6. Sukertha Pamitegep :	
Kaping : 1. Indik Karang, Tegal lan carik	19 - 20
Kaping : 2. Indik Kekayonan.....	20 - 21
Kaping : 3. Indik Wewalungan.....	21
Kaping : 4. Indik Wewangunan.....	22
Kaping : 5. Indik Baya Lan Dusta.....	22 - 24
Kaping : 6. Penyanggrahan Desa.....	24
SARGA : IV. SUKERTA TATA AGAMA :	
Pelet : 1. Dewa Yandnya.....	24 - 29
Palet : 2. Rsi Yandnya.....	29 - 31
Palet : 3. Pitra Yadnya.....	31 - 34
Palet : 4. Indik Manusa Yadnya.....	34 - 35
Palet : 5. Indik Butha Yandnya.....	35 - 36
SARGA : V. SUKERTA TATA PAWONGAN :	
Palet : 1. Indik Pawiwahan.....	37 - 38
Palet : 2. Indik Nyapihan.....	38 - 40
Palet : 3. Indik Sentana.....	40 - 41
Palet : 4. Indik Warisan.....	41 - 43
SARGA : VI. WICARA LAN PAMIDANDA :	
Palet : 1. Indik Wicara.....	43
Palet : 2. Indik Pamindanda.....	44 - 45
SARGA : VII. NGUWAH-NGUWUHIN AWIG-AWIG :.....	45
SARGA : VIII. PAMUPUT.....	45 - 46

MURDHA – CITTA

OM SWASTYASTU

Sakeng pasewecan Ida Sang Hyang Widhi Wasa, punika mawinan Desa Adat Anjinga, Kecamatan Banjarangkan, Kabupaten Klungkung, duk paruman nyane gilik seguluk saha cita nirmala ngemanggehang Awig - Awing tur raris presida kasuratang.

Daging kecap puniki pacing memawos indik Pakraman, Indik Agama miwah pawongan kalih sima rauh ring laksana, minakadi dasar suka – duka nganutin perarem.

Awig - Awig wantah pinaka dasar sendi pamikukuh Desa Adat, sejeroning minabdabin kalih nyanggra kesukertan Desa rauhing kulewarga pawongan nyane, kejangkepin antuk Dharma prewerti ngerajegang Sang Hyang Aji Agama, ngemanggehang tawaning Tri Hita Karana manut dresta.

Sejaba dresta inucap pamkas Pancasila, Undang – Undang Dasar 1945 miwah sehanan Peraturan – Peraturan Negara Republik Indonesia, tan kelempasin antuk Awig – Awig puniki.

Mogi - mogi peresida mikolihang manut sekadi patitis nyane.

OM SANTI, SANTI, SANTI, OM

SARGA I
ARAN LAN WEWIDANGAN DESA

Pawos : 1

1. Desa Adat puniki mewasta Desa Adat Anjingan
2. Wates wewidangan Dsa Adat puniki nyatur Desa luire :
 - a. Wates sisi Lor : Desa Adat Getakan
 - b. Wates sisi Wetan : Tukad Kerincing (Desa Adat Penasan)
 - c. Wates sisi Kidul : Penyampuhan Tukad Kerincing ring Tukad Bubuh
 - d. Wats sisi Kulon : Tukad Bubuh (Desa Ada Semeangun)

Pawos : 2

1. Desa Adat Anjingan gilik dados a Banjar
2. Desa Adat Aningan ngewengku :
 - a. Pura - Pura :
 1. Pura Kahyangan Tiga (Puseh, Dalem Baleagung)
 2. Pura Mas Melanting Ayu
 - b. Tanah :
 1. Tanah carik, laba Pura
 2. Tanah Tegak, laba Pura
 3. Tanah Bale Desa Adat
 4. Tanah Setra
 5. Tanah margi lan rurung
 6. Tanah Pekarangan Desa
 7. Tanah Telabah

Pawos : 3

Wewidangan Desa Adat Anjingan Kalinggihin antuk :

- a. Krama Desa mawed
- b. Karma pangumbaran sinanggeh tamiu

SARGA II
PETITIS LAN PAMIKUKUH

Pawos : 4

Desa Adat Anjingan ngenaggehang Dasar :

- a. Tri Hita Karana manut tatwaning Bhuwana Agung.
- b. Catur Dresta nganutin Sang Hyang Agama.
- c. Pancasila, UUD. 1945, Miwah Sehanan Peraturan – Peraturan Negara Republik Indonesia

Pawos : 5

Petites (tujuan) Desa Adat Anjingan Luire :

- a. Mikukuhin miwah ngajegang Agama Hindu
- b. Nginggilang tata prewertine megama.
- c. Ngajegang kesukertan Desa saha pawongannya sami sekala lan niskala
- d. Ngajegang tata sangaskaraning pawongan, pamekas sane ngiket kulawarga pasuka - dukan (Gotong – royong)
- e. Ngajegang kesukertan sraje druwening Desa miwah druening pawongan sami.

SARGA III

SUKERTA TATA PAKRAMAN

Palet : 1

Indik Krama lan Warga Desa

Pawos : 6

1. Sane kebawos Warga Desa Anjingan inggih punika :
Sehananing wang sane jumenek ring wewidangan Desa Adat Anjingan, saha satinut ring Awig - Awig Desa lan pemargin Desa Adat Anjingan.
2. Sane kebawos Krama Desa inggih punika :
 - a. Sehananing wang sane jumnek ring Wewidangan Desa Adat Anjingan sampun alami rabi, nyungsung Khayangan Tiga, tur satinut ring daging Awig - Awig puniki.
 - b. Sang mawed sakeng Desa Adat Anjingan, sakwanten magenah ring jaba Desa utawi jaba kuta melarapang antuk ngerereh pangupa jiwa patut kantun mekrame, sakewanten swadharmannya patut naur jinah pemelagaan.

Pawos : 7

Karma Desa Adat Anjingan kepalih dados ptang sorong luire :

- a. Karma marep ayahan angkep.
- b. Karma marep ayahan asibak.
- c. Karma marep ayahan melaga.
- d. Karma marep ayahan napuk

Pawos : 8.

Sehanan Krame Desa keni ayah - ayah kadi ring sor :

- a. Krama marep ayahan angkep.
 1. Krama sane patut nyanggra ayahan Desa
 2. Keni ayahan lanang lan istri manut pemargin desa
 3. Keni peson - peson napi luih manut pemargin Desa

- b. Krama marep ayahan asibak :
 1. Karma sane patut nyanggra ayaha Desa
 2. Keni ayahan lanang kewanen utawi istri kewanen
 3. Krama sane kepatutang ken i ayahan lanang utawi istri kewanen inggih pinika :
Krama nunggal ngayahan karang Desa, lan krama Desa sane dados Pegawai (ABRI) tugas ring jaba Desa utawi jaba kuta madruwe kulawarga lanang kewanen jumenek ring Desa Adat Anjingan dados ayah lanang, yan madruwe kulawarga istri kewanen dados ayah istri.
 4. Indik peson - peson napi lui r pateh ken i sekadi patut.
 5. Indik duman dedosan apah tenge, duman lian ring dedosan pateh sekadi patut.
- c. Krama ngarep melaga (nuntut)
 1. Krama sane patut nyanggra ayahan Desa magenah ring jabe Desa wiadin jaba kuta.
 2. Ten ken i ayahan lanang lan istri.
 3. Indik peson – peson wewangunan ken i sekadi patut.
 4. Indik penelas pengaci ken i kalih pah tiga (2/3)
 5. Indik duman dedosan lan lungsuran pengaci tan polih.
 6. Peson – peson wewangunan, miwah pengaci ke bawos melaga ketaur amasa apisan ring rahina Ngusaba Desa Purnama Kedasa.
 7. Yening nenten naur jinah pemelaga ngantos pang tiga wenang kepenging. Wekasan yan ipun mewali budal, malih jagi nganutin mekrama patut ken i pamidanda luire :
 - a. Nebas kesisipan kaiwangannya nguni.
 - b. Tulak wali 500 jinah bolong.
 - c. Tulak mincir 500 jinah pis bolong
 - d. Penyagsag Wirasa 500 jinah pis bolong.
 - e. Titian Masa 500 jinah bolong amasa.
- d. Krama Ngarep ayahan nepuk.
 1. Krama sane patut nyanggra ayahan Desa, minakadi ayah karang Desa, krama silidii durung mayusa limolas masa sakewanten langkungan ring roras masa.
 2. Indik peson – peson napi lui r pateh ken i sekadi patut.

Pawos : 9

Ngawit tedun makrama Desa luire :

- a. Indik kulawarga Wed.
Saluiring warga Desa sampun alaki rabi patut ketedunang mekrama sekirang-kirang ipun tigang sasih wit sakeng pengambilan anak istri.

- b. Ritankala wenten anak sewos - sewos rauh sakeng jaba Desa miwah jaba kuta megama hindu nyadia pacang tedun mekrama kepatut :
 1. Mangda muat surat-surat keterangan sakeng Wed ipun.
 2. Mangda muat surat-surat keterangan ring Kepala Dusun miwah Klian Adat indik sumanggup nganutin Awig-Awig sane kemanggehang.
 3. Sampun jumenek ring Desa Adat Anjingan mewates tigang sasih.
 4. Naur pusaka mapewilangan 50 jinah bolong.
 5. Naur jinah tenem tuwuh mapewilangan 1.500 jinah bolong yening wenten jinah kas patut nutug.
 6. Ritakalaning ipun magingsir genah, pacang merarian mekrama tan kepatut nagih ngedum druwen Desa Adat, kepatut ipun matilar jua.
 7. Yening madruwe utang patut ketaur dumun.
- c. Ritakala wenten anak sewos (WNI / sunantara asing) liyanan ring Agama Hindu jumenek ring wewidangan Desa Adat Anjingan ke patut :
 1. Indik pang tedun mekrama Desa Adat nenten keluarga.
 2. Keluarga jumenek ring Desa Adat Anjingan yening sampun mewates asasih pitung rahina kepatut :
 - a. Naur penukun wewangunan selian ring Pura, ketaur nyabran enem sasih apisan ring rahina Buda Kliwon Dunggulan.
 - b. Patut polih pengayon ring krama Desa manut ring peraturan pemerinta, sakewanten yening wenten kelayuan tan kelugra ngangge setre.
 - c. Patut nganutin sima laksana sane sampun memargi ring wewidangan Desa Adat Anjingan.
 - d. Yening tan nganutin kadi kecap ring ajeng tan kelugra jumenek ring wewidangan Desa Adat Anjingan.

Pawos : 10

Penyanggran (kewajiban krama Desa Adat Anjingan luire) :

- a. Sehanan krama Desa patut satitut suaran gendongan manut ring arah - arah, wiyadin manut ring daging Awig-Awig puniki.
- b. Sehanan krama Desa patut satinut tur nyungjung banget Awig - Awig Desa, Ilikita, miwah pasuaran Desa Adat Anjingan.
- c. Sehanan krama Desa ayahan angkep lan ayahan asibak lanang patut keni kesinoman arah asasih suwen ipun, ngawit sakeng rahina Umanis Anggar Kasih, ketampiing ring rahina Anggar Kasih.
- d. Sehanan krama Desa patut satitut ring tatiwak Prajuru ritakala ngenterang pemargin kertin Desane.

- e. Naur peson – peson wewangunan miwah pengaci.
- f. Wenang sareng natak panes tis kertin Desane.

Pawos : 11

Swadharmaning tamiu :

- a. Tinut ring tatiwak Desane, mangda sareng ngardi kesukertan Desane ring sekala.
- b. Tan wenang nungkasin sepemargan kertin Desane.

Pawos : 12

Merarian dados krama Desa :

- a. Merarian antuk pinunas ngeraga, seantukan pacing megingsir genah sakeng wewidangan Desa Adat Anjingan kepatut :
 - 1. Ngelungsur mepamit ring peparuman krama Desa, risampune puput bebawosan ring prajuru.
 - 2. Yening wenten utang ring Desa patut ketaur dumun.
 - 3. Ten patut nagih ngedum druwen Desa
 - 4. Wekasan yening mewali budal, malih pacang nyadia mekrama sakeng rahayu patut katrima risampune :
 - a. Puput bebawosan ring prejuru Desa Adat.
 - b. Naur Tulak Wali ampewilangan 500 jinah bolong.
 - c. Yening wenten jinah kas patut nutug.
- b. Balu geligiran tan nagmong karang Desa, risampune manut kadi kecap ring ajeng (1.1/1.2/1.3).
- c. Sampun lingsir kirang langkung mayusa 70 mase sentanaia during antes ngayahang kelugra :
 - 1. Luput sehananing ayah ring Desa
 - 2. Indik peson-peson napi luih keni sekadi patut.
 - 3. Duman dedosan tan polih duman lian ring dedosan polih sekadi patut.

Pawos : 13

- 1. Kenorayang antuk krama Desa :
 - a. Nenten tinut ring Awig-Awig Desa Adat utawi pemargin Desane sane sampun kemanggehang wiyadin kesungkemin sareng sami.
 - b. Ageng kesalahan ipun ring Desa Adat tur nganutin pituduh prajuru, indik nyupat raga Desa Adat tur nganutin pituduh prajuru, indik nyupat raga ngesehin parisolah prewerti mekrama.

- c. Krame ngarep ayahan melaga sane tan naur jinah pemelagaan ngantos pang tiga.
 - d. Sang kenorayang tan polih pahpahan sangkaning druwen Desa.
 - e. Desane wusan mepaweweh pesayuban kesukertan utawi pengayom arep ring kenorayang.
 - f. Krama Desa tan kengin mebawos –bawos arep ring sang kenorayang.
 - g. Wicara sang kenorayang inucap katur ring sang rumawos Adat.
2. Wekasan yening sang kenorayang sampun eling ring raga indik keiwangan nyane nyadia pacang tedun mekrama patut katerima malih risampune :
- a. Puput bebawosan ring prajuru pacang nganutin tata kramaning Desa Adat Anjingan
 - b. Ngaturang pejati ring Pura Desa, indik jagi ngeningan raga pacang nganutin Awig-Awig Desa utawi pemargin Desane sane sampun kemanggehang manut peparuman.
 - c. Nunas pengaksama ring Desa Adat ketuntun olih prajuru ring peparuman Desa Adat.
 - d. Patut keni pamidanda luire :
 - 1. Nebas kesisipan keiwangannya nguni.
 - 2. Tulak wali 500 jinah bolong.
 - 3. Tulak mincir 500 jinah pis bolong
 - 4. Penyagsag Wirasa 500 bolong
 - 5. Titian Mase 500 jinah bolong amase.

Pawos : 14

Kepatutan (Hak) krama Desa Adat Anjingan luire :

- a. Saluiring krama Desa Adat ngarep wenang ngemedalang bebawos rikalaning wenten pepauman ngaturang napi luir sane manggeh ring pekayunan soang-soang sane mawesane becik.
- b. Saluiring krama Desa Adat kawenang sareng memilih wiyadin kepilih dados prajuru.
- c. Rikala wenten sinalih krama Desa Adat madruwe karya napi luirnya kalugra ngangge Bale Desa Adat miwah perabot manut kadi sampun kemanggehang ring peparuman.
- d. Yening wenten sinalih tunggil krama Desa kedura cara kesukertan nyane antuk semeton sewosan patut atur supeksa pakeweh ika ring prajuru.
- e. Yening wentwn sinalih tunggil krama Desa sane kesisipang, manut rencana pacang kerarianang mekrama dados langkungan ring asasih.

- f. Yening wenten sinalih tunggil krama Desa Adat sampun kerarianang mekrama Desa nyadia pacang mewali tedun nyarengin mekrama patut nunas bebasan ring Klian Adat lan Kepala Dusun. Klian Adat lan Kepala Dusun ngewentenang kerta Desa Adat kerahin olih sang mapinunas. Kerta desa adat ngicenin pemargin manut ring daging Awig-Awig puniki.

Pawos : 15

Yan wenten wang sakeng jaba Desa utawi jaba kuta, madunungan ring sewengkonin Desa Adat Anjingan, sang kedunungan patut mapesedek ring Klian Adat lan Kepala Dusun tur wang punika patut kesarengan. Sakewanten wates dados madunungan wantah asasih. Yan lintangan ring asasih patut yantenang raga ring prajuru.

Pawos : 16

Yan wenten krame Desa madruwe oka lanang lintangan ring asiki, sane dados silidii oka lanang sane paling dumun ngambil rabi. Krama silidii nenten keni punapa-punapi langsung nyilidii dados krama ngarep yening sampun mewaneng tigang sasihwit sakeng pengambilan rabi.

Pawos : 17

Yan wenten anak-anaking Desa Adat Anjingan, sane kantun teruna, magenanh ring jaba Desa utawi jaba kuta, wekasan yan ipun madruwe rabi kepatutang tedun mekrama, yan ipun tan arep, ipun arep madesa sewosan nanging yan wekasan ipun budal melarapan antuk nyelosin waris metu pemargi patut pemargin ipun ngemargiang silidii.

Pawos : 18

Tingkahing kulewarga sane kepatutang dados tedun ngayang krama Desa luire :

- a. Sampun dehe miwah teruna kedik mayusa limolas masa.
- b. Sampun ngeranjing ring Sekehe Taruna-Taruni.
- c. Nganutin peraraga samoun keantesang olih prejuru.
- d. Klian Adat patut nambiyakang indik dehe Taruna utawi Taruni sane sampun dados ngayahang kramaDesa, nyabran Karya Ngusaba Desa ring Pempatan Agung Desa Adat Anjingan.
- e. Krama ayah pengele patut ngaturang gegiras ngabdiang raga ring krama Desa tur nganutin pituduh prejuru.
- f. Yening wenten kulewarga sampun lingsir kirang langkung mayusa pitung dasa masa tan kelugra ngayahang krama Desa. Sakewanten indik tetimbang manut dresta kantun patut ketunasin.

- g. Yan ana wang beneh tedun ngayang saluiring karya Desa Adat sang kaning kapituduh olih sinalih tunggil krama Desa. Punika tan dados.

Pawos : 19

1. Kewentenang sinoman (saya) ring Desa Adat Anjingan luire :
 - a. Sinoman (saya) arah.
 - b. Sinoman (saya) Wali Ageng ring Pura-Pura
 - c. Sinoman (saya) Wali Alit ring Pura-Pura
2. Swadarmaning sinoman sowing-sowang luire :
 - a. Sinoman arah.
 1. Ngemargiang saluiring arah-arah, sane kapituduh sakeng prejuru.
 2. Luput sehananing karya ayah lanang.
 3. Sinoman arah ritakala ngmargiang arah-arah tan kepatut ngerauhang arah ring anak alit.
 4. Ritakala sinoman arah ngemargiang arah-arah sang kerahin utawi kulawargan nyane, sane patut kerahin tan wenten ring jero sang mepengarah wenang ngnahang sawen, makecihne sampun ngerauhang arah-arah. Indik sawen mangda ngangge carang kayu hidup tan paguna.
 5. Ritakala sinoman ngemargiang arah-arah patut ngangge selempot maka cihna ngmargiang pemargin Desa Adat.
 6. Wewenangan dados sinoman arah wantah asasih suwen ipun.
 - b. Sinoman Wali Ageng ring Pura-Pura
 1. Mebersih-bersih ritakala kawentenang karyaKarya ring Pura utawi ring Desa Adat.
 2. Nyanggra sehananing penelas toya, ritakala kawentenang karya kadi inucap ring ajeng.
 3. Nyanggra sehananing pemargi ngerereh serana indik pemargin upakara manut dresta.
 4. Polih cenengan sane mewaste pematut (towas) manut pepauman.
 5. Ngemargiang arah-arah sane kapituduh olih prejuru, pemargin arah-arah manut kadi swadharmaning sinoman arah.
 6. Ngemit utawi nureksain ring pura sadurung kemit lilitan rauh.
 7. Wewanengan dados sinoman Wali wantah apuputan karya.
 - c. Sinoman Wali Alit ring Pura-Pura

Swadarnaning sninoman Wali Alit ring pura-pura pateh sekadi sinoman Wali Sgeng, sekewanten indik pematut (towas) marupa ulam tan polih.

Pawos : 20

Skehe Gong Desa Adat Anjingan

- a. Skehe Gong ring Desa Adat Anjingan kasudi olih krama Desa Adat mejalarang antuk Klian Adat
- b. Skehe Gong Desa Adat Anjingan kapidabdabin olih Klian nyane sane kesungkemin olih skehe inucap.
- c. Nyanggra sehananing karya ring Desa Adat ring Pura-Pura tur ring krama Desa sane muatang suaran Gong ritatkala ngemargiang upakara manut Agama.
- d. Indik upah wiyadin batu-batu kewentenang nyane madudon-madudon manut pinunas sang madruwe karya, kehye manut pepauman skehe inucap tur kesungkemin olih krama Desa Adat.
- e. Indik ulih-ulihan Skehe Gong marep Desa adat Anjingan luire :
 1. Sehananing upah utawi batu-batu sane ketaur olih sang sanga ngupah, pah tiga, duang pahan kaduwe olih skehe Gong apahan ngeranjing ring Desa Adat Anjingan.
 2. Indik peson-peson napi luih krama Desa Adat Skehe Gong pateh keni sekadi patut.
 3. Luput ayah lanang ngawit sakeng pitung rahinan wali (karya) ngantos puput.
 4. Polih paica linggih ring pura ritatkala Wali Ageng.
- f. Indik perebiye kerusakan kendang ring jagat, setali-tali kesanggra olih Skehe Gong, nanging kerusakan kerawang utawi pelawah kesanggra olih Desa Adat.
- g. Tapkala krama Desa molahan Skehe Gong sareng meolahan sekadi patut.
- h. Yening krama Desa tedun mekarya napi luire, tatkala Skehe Gong kupakan olih wang krama Desa utawi pekaryan Desa Adat ring Desa tan keni Dosa.
- i. Ngelawangan Ida Betara ring Galungan kesanggra olih Skehe Gong
- j. Skehe Gong patut ngemargiang sapituduh krama Desa, manut daging Awig-Awing puniki utawi sane kesungkemin manut pepauman krama Desa sareng Skehe Gong.
- k. Wewenangan skehe Gong limang masa.

Pawos : 21

Sehananing wang skehe Teruna-Teruni ring Desa Adat Anjingan kepatutang ngaturang ayah nyanggra sehananing karya ring Desa Adat sekadi gotong royong. Sehananing pemargi ngaturang ayah ke enter olih Klian nyane sowang-sowang manut skehe inucap.

Pawos : 22

Kesatuan Hansip miwah Pecalang Desa Adat Anjingan :

- a. Nganutin pituduh Pemerintah.
- b. Nyanggra kasukertan Desa Adat rauh druwen kulawargannya sowang-sowang.
- c. Busana (pakaian) Hansip miwah Pecalang kesanggra antuk Desa.
- d. Nereptiyang wewalungan ring wewidangan Desa Adat Anjingan.
- e. Ngiskis ring pelemahan Bale Desa Adat.
- f. Polih lelungan sehananing karya ayah lanang ring Desa Adat Anjingan setiyos ring meolahan lan pepauman wengi.
- g. Indik peson-peson nabi luire ring Desa adat keni sekadi patut.
- h. Indik pemargi-pemargi tiyosan nganutin perarem.
- i. Wewanengan Hansip miwah Pecalang limang masa.

Pawos : 23

Yan ngewentenang skehe-skehe sane tiyosan taler kelugra, yening sampun nganutin pituduh sakeng pemerintah utawi ngajegang prewertu megama minekadi Skehe mejejaitan, bebantenan, kidung, PKK, Olah Raga miwah sane lian-lianan yan sampun kepatutang olih pemerintah utawi Desa Adat.

Pawos : 24

Yening wenten krama Desa Adat madruwe oka lanang utawi istri muah roban sane patut ngranjing masekolah utawi sampun mayusa pitung masa ngantos roras masa, patut kasekolahang sakuweh putrane wiyadin roban sami paling kidik tamat ring Sekolah Dasar.

Pawos : 25

Yening wenten krama Desa Adat sampun alaki rabi kepatutang nganutin sane mewasta “Keluarga Berencana”.

Pawos : 26

1. Krama Desa Adat kepartut naur pajeng manut pituduh pemerintah Agung.
2. Yan prade tan sida naur manut penemayannya, keni danda ring Desa manut perarem.

Palet : 2

INDIK PRAJURU

Pawos : 27

1. Prajuru Desa Adat Anjingan luire :
 - a. Klian Adat (Bendesa Adat)

- b. Penyarikan (Sekretaris), Desa Adat.
 - c. Petengen (Bendahara) Desa Adat.
 - d. Klian Pengeling Pura Kalih Diri.
2. Usaha Sabha Desa Adat Anjingan luire :
- a. Para Prajuru Desa Adat.
 - b. Kepala Dusun.
 - c. Para Sujanawan Desa Adat
 - d. Para Prajuru Skehe-Sekehe sane wenten ring Desa Adat Anjingan.
3. Kerta Desa Adat Anjingan :
- a.
 - 1. Klian Adat (Bendesa Adat)
 - 2. Kepala Dusun
 - 3. Penyarikan (Sekretaris) Desa Adat
 - 4. Prajuru Hansip miwah Pecalang.
 - 5. Prajuru Teruna-Teruni
 - 6. Kasudi adiri olih Klian Adat sane keanggehang uning mebawos nepasin wicara nganutin daging Awig-Awig Desa Adat Anjingan.
 - b. Manut linggih Kertha Desa Adat luire
 - 1. Pinaka Kertha :
 - a. Klian Adat (Bendesa Adat)
 - b. Kepala Dusun
 - c. Adiri sane kasudi
 - 2. Penyurat : Penyarikan (Sekretaris) Desa Adat.
 - 3. Pengabih Kerta Desa :
 - a. Prajuru Hansip wiyadin Pencalang
 - b. Prajuru Teruna-Teruni
 - c. Para sujanawan sane kemanggehang
 - c. Pengabih wantah nyaksiang pemargin Kertha Desa
 - d. Prade tan presida puput katur ring sang rumawos

Pawos : 28

- 1. Sane kemanggehang dados Prajuru manut kecap kadi ring sor :
 - a. Dados krame ngarep ayahan angkep.
 - b. Uning ring sastra, nyurat lan ngewacen
 - c. Mewibawa tur uning ring sima laksana manut dresta
 - d. Mayusa sawetara 25 masa ngantos 60 masa
 - e. Jujur tus melaksana becik

- f. Tan cedangga
 - g. Tan naanin kenorayang antuk krama desane
 - h. Tan kalibat antuk G 30 S/PKI
2. Yening sinalih tunggil prajuru punika kepilih ngantos pang tiga pacang kewehin pangeling-eling minekadi “Tanda Penghargaan”
 3. Wewanengan dados prajuru limang masa. Paling kidik asasih sadurung wewanengan parajuru iniap mangda ngaturang pakeling ring krama Desa tur pacang ngerancanayang “Panitia Pamilihan”
 4. Sadurung wenten kemanggehan Prajuru sane pang ngentosin, prajuru sane riin inucap tetep ngenterang pandidikan krama Desa.
 5. Sang sampun kemanggehan dados prajuru mangda matur piuning ring Pura Khayangan Tiga Utawi ring Penyungsungan Desa Adat, nunas wara nugraha ring ida Sang Hyang Widhi sumangdane labha karya riwekas pang ngemargiang daging Awig-Awig puniki.
 6. Pemargi inucap kesanggra olih Desa Adat.

Pawos : 29

Tata caraning pemilihan dados prajuru :

- a. Kelaksanayang antuk “Panitia”
- b. Tan kewenangan kesungkemin peremangkin.
- c. Calon Prajuru punika soang-soang mangda polih suara tan kirang limolas (15) sinurat ring sejeroning ilikita, (blanco) tur sampun menggah wasan sang calon saha lingga tangan pemilih.
- d. Para calon tan kelugra dados Panitia.
- e. Raris kawentenang pemilihan antuk krama Desa sinamian.

Kejantenang ika kadi ring sor :

1. Sane memilih krama Desa ngarep
 2. Sane polih suara paling makuweh kemanggehang dados Prajuru.
 3. Yan prade wenten suara, sane mayusa paling duur kemanggehang.
- f. Sesampune wusan pemilihan, tur sampun wenten calon pacang kemanggehan kejantenang ipun sapuniki :
 1. Sane polih suara paling makuweh dados Klian Adat (Bendesa)
 2. Petengen (Bendahara), Klian Pengeling Pura kekalih manut linggih ketetepang olih Panitiamanut ring kawikannan nyane soang-soang.
 3. Indik Penyarikan (Sekteraris) Desa Adat kasudi olih Bendesa adat sareng prajuru sewosan.
 4. Kawentenang pamikukuh ring perareman Desa Adat sane memaosang indik punika, nganutin sima lan Agama

Pawos : 30

Penyarikan Desa Adat kasudi olih prajuru ring peparuman Usaha sabha Adat, raris kawentenang pengukuhan ring paruman krama Desa Adat.

Pawos : 31

1. Swadarmaning Prajuru Desa Adat Anjingan :
 - a. Ngewentenang paruman Desa Adat
 - b. Ngambel tur ngelaksanayang sedaging Awig-Awig puniki miwah pamutusnya
 - c. Ngeraksa saha ngatur seraja berana druwen Desa Adat manut pepauman
 - d. Nuntun tus ngenterang krama Desa rauning warga Desane sami nuju kesukertan sekala niskala.
 - e. Nuntun saha ngenterang warga Desa sami ngupadi nginggilang Sang Hyang Agama, Kesucian Kahyangan, Kesucian Pawongan, Kesucian Palemahan miwah tata caraning ngangge Setra.
 - f. Mawosin kalih niwakang pemutus marep ring wicara Desane
 - g. Maka saksi warga Desane, rikalaning wenten sinalih tunggil Krama Desa pacang meras oka.
 - h. Pinaka duta Desa Adat Anjingan pacang ngewentenang temu bebawosan ring sang sapisira ugi.
2. Tata caraning ngelaksanayang Swadarmaning prajuru ring ajeng patut manut ring Awig-Awig, ilikita, pasuaran miwah dresta Desa Adat Anjingan.
3. Pelaksana ring ajeng patut damyakang ring peparuman kepungkur ipun.
4. Nyurat pamutus paruman Desa Adat tur ngelaksanayang manut Swadarmaning soang-soang.

Pawos : 32

Swadarmaning Prajuru soang-soang

- a. Klian Adat (Bendesa Adat)
 1. Ngelaksanayang Awig-Awig Desa Adat serajeg-rajeg ipun
 2. Ngenterang kesukertan sekala niskala
 3. Ngenterang Ngusaba Desa ring Pempatan Agung Desa Adat Anjingan rikalining Purnama Kedasa
 4. Maka saksi rikalaning wenten warga Desa nagun karya manut Agama sekadi medengen-dengen, meras oka miwah sane liyan-liyanan
 5. Nuntun saha nureksain saluiring upekara Pnca Yadnya ring Desa Adat miwah Pawongannya soang-soang

6. Ngenterang sehananing wewangunan ring wewidangan Desa Adat Anjingan rauh ring Pura-Pura
 7. Nemuang saha mutus sejeronong wicara manut Adat.
- b. Penyarikan (Sekretaris) Desa Adat :
1. Nyurat seluiring rencana wewangunan ring Desa Adat Anjingan
 2. Ngelaksanayang saluiring ilikita (Administrasi) Desa Adat
 3. Nyurat saha merinci druwen Desa sane merupa barang
 4. Ngewakilin Klian Adat (Bendesa Adat) yening kapialang
- c. Petengen (Bendahara) Desa Adat :
1. Ngambel utawi ngraksa druwen Desa sane marupa jinah
 2. Nureksain sejeroning druwen Desa
 3. Ngabih tugas-tugas prajuru sewosan
- d. Klian Pangeling Pura :
1. Ngenterang saha ngelaksanayang upekara Desa Yadnya miwah Bhuta Yadnya ring Pura Khyangan Tiga miwah Pura Penyungsungan Desa Adat
 2. Ngentrang laksana kesucian ring Pura-Pura inucap ring ajeng.
 3. Nuntun pemargi krama Desa ngajegang Sang Hyang Agama
 4. Nureksain saha midabdabin sehananing wewangunan miwah padruwen Pura-Pura inucap ring ajeng

Pawos : 33

Olih-olihan Prajuru Desa Adat luire :

- a. Leluputan peson-peson utawi urunan upekara ring Pura Penyungsungan Desa Adat.
- b. Leluputan peson-peson utawi urunan ring Ngusabha Desa Adat
- c. Polih cenengan (pematut) ritatkala krama Desa meolahan tatkala piodalan ageng ring Pura-Pura utawi Ngusabha Desa Adat.
- d. Peson-peson wewangunan ring wewidangan Desa Adat Anjingan pateh keni sekadi patut
- e. Polih malih apah tenge sejeroning duman soang-soang, duman dedosan lan lungsuran upekara ring Pura utawi ring Desa Adat.
- f. Miwah sane lian-lianan manut perareman

Pawos : 34

Olih-olihan lan leluputan Prajuru inicap ring ajeng manut swadarmaning soang-soang luire :

- a. Klian Adat (Bendesa Adat)
Tugas sehananing upekara ring Desa Adat miwah ring Pura-Pura Khyangan Desa

- b. Penyarikan (Sekretaris) Desa Adat
Ring Desa Adat setiyosan ring Pura-Pura
- c. Petengen (Bendahara)
Ring Desa Adat setiyosan ring Pura-Pura
- d. Klian Pengeling Pura
- e. Ring Pura-Pura, Khyahangan Desa Adat Anjingan

Pawos : 35

1. Yan wenten sinalih tunggil Prajuru iwang sesanania, miwah ngeliyokin sehanan druwen Desa tur peresida kebuktinyang keiwangannya antuk ikrama, punapi malih banget tiwal ring daging Awig-Awig, miwah pasuaran patut keni pamidanda nikel ring pamidanda krama seosan.
2. Prajuru sane kesisipan kadi kecap ring ajeng kepatutang ngewaliang sehananing druwen Desa, saha kegin kerarianang dados Prajuru.
3. Prajuru sane kesisipang kadi kecap ring ajeng tan kelugra ngeterang saha nuntun perareman krama Desa Adat ngawit punika.
4. Indik kewentenang perareman punika patut katuntun antu prajuru siwosan, taler tan preside kangkat kemargiang olih salah sinunggil Krama Desa sane kasudi olih Krama Desa ring perareman, mewaneng apuputan wiara.

Pawos : 36

Klian Desa Adat Anjingan, wiyadin Prajuru siwosan kagentosin majalaran antuk :

- a. Sampun tugtug sengker dados Prajuru (5 masa)
- b. Lampus utawi seda
- c. Tan sida memanggiang swadarmaning Desa Adat utawi sungkan-sungkakan lan kapialang abot sane siwosan minekadi pang magingsir genah ke jaba Desa wiyadin jaba Kuta
- d. Sangkaning pinunas Prajuru ngeraga, sakewanten sampun kesungkemin antuk Krama Desa Adat ring peparuman
- e. Sangkaning kerarianang olih Krama Desa Adat seantukan iwang pemargi

Palet : 3

Indik Peparuman

Pawos : 37

1. Paruman Desa Adat kawentenang asasih apisan ring rahina anggar Kasih, saha kawentenang ingkrem
2. Paruman patgatakala manut pabuat utawi pemargin Desa Nganutin arah-arah

Pawos : 38

Tata terepti rikalaning parum :

- a. Nganutin arah-arah melarapan antuk suara kulkul
- b. Sang pang ngamiletin patut mabusana adat
- c. Ritatkala patum tan kedadosan makta gegawan makta ayam miwah sane sewosan, sane ngeranayang peparuman tan arep memargi beik
- d. Paruman-paruman Desa Adat mangda katedunin olih Krama Desa ngarep tan kelugra medaling susukan
- e. Pengawit paruman patut ngaturang cane ring Ida Begawan Penyarikan wus punika wawu nyaak yan kasep rauh patut keni janggi manut perarem.
- f. Sehananing paruman sida lumaksana yan sampun katedunin antuk sang patut nyarengin bilih langkungan ring atenga keh ipun
- g. Sehananing pemutus kautsahayang pisan mangda gilik-saguluk (suara bulat) yening tan nyidayang suarane makehan sinanggeh pamutus
- h. Pemutus paruman sane sampun kesungkemin inucap wenang keanggen uger-uger geguwat tata pangenter ring Desa Adat.
- i. Sehananing bebawos ring peparuman mangda nganutin sesana manut dresta
- j. Tan patut ngemedalang bebawos sane tan becik napi malih ngantos ngeletehin krama Desa
- k. Nganutin pituduh Prajuru

Pawos : 39

Acara utawi daging peparuman :

- a. Kadulirin antuk panganjali umat “Om Swastyastu”
- b. Sane pang kebawosan mangda kesiarang dumun manut rerinikan
- c. Bebawosan ring peparuman mangda manut ring aara paruman
- d. Yening wenten pacang kebawosan tiyos ring acara paruman mangda kebawosan ring sampunne bebawosan manut acara inucap puput.
- e. Pemuput peparuman ngaturang parama santi sareng sami

Pawos : 40

1. Pamutus paruman yening nenten kasurat seantukan nenten perlu kasurat kewastanin pasuaran, minakadi pacang ngupah ilen-ilen, gotong-royong miwah sane lianan
2. Pamutus paruman sane kasurat mewasta ilikita
3. Pamutus paruman inuap ring ajeng sinanggeh sepat siku-siku, patut katinutin antuk wang Desane sami.

Pawos : 41

1. Yan ana sinalih tunggil krama Desa nenten nganutin tata terepti ring ajeng manut pasuaran keni danda
2. Yan ana bebawos tan beik napi malih ngelethehin krama Desa patut keni pamidanda manut perarem.

Palet : 4

Indik Kukul

Pawos : 42

Indik kewentenan Kukul ring Desa Adat Anjingan inggih Punika :

- a. Kukul Pajenengan ring Pura-Pura
- b. Kukul Desa Adat
- c. Kukul Skehe Gong
- d. Kukul Skehe Teruna-Teruni
- e. Kukul Hansip miwah Pecalang
- f. Kukul Subak Tempekan Anjingan
- g. Kukul ring Pura Merajan/Paibon soang-soang
- h. Kukul ring karang paumahan

Pawos : 43

1. Kukul ring Desa Adat tan wenang ketepak yan tan manut kadi daging Awig-Awig puniki
2. Tabuh tetepakan kukul Desane manut dudonan luire :
 - a. Tengeran kukul upekara Dewa Yadnya ring Pura, minekadi Betara pang tedun, betara rauh sakeng melancaran, nyineb ida Betara, suaran Kukul Pejenengan punika nungtit mesangsia lanang wadon.
 - b. Tengeran krama Desa pacang mekarya (gotong-royong) duang tuludan tadah gancang.
 - c. Tengeran parum, duang tuludan nanging kekawitin antuk akelentungan ngandet.
 - d. Tengeran anak merabian : Duang tuludan tadah gancang kekawitin antuk tigang kelentungan ngandet kesuarayang wengi.
 - e. Tengeran warga Desa seda (lampus) : Limang kelentungan pengeten , duang tuludan tadah alon ngeraremin sang kelayuan
 - f. Tengeran warga Desa madruwe oka : yening lanang petang kelentungan, yening istri duang kelentungan
 - g. Tengeran warga desa keni baya : Atuludan gancang mangda kesambungin olih kukul karang pauman.

3. Suaran kulkul Skehe sane wenten ring Desa Adat Anjingan ketepak amanut pabuat nyane soang-soang
4. Suaran kulkul ring karang paumahan nganutin baya.

Pawos : 44

1. Kulkul krama Desa Adat tan wenang ketepak yan tan sangkaning pituduh prajuru Desa. Sejawaning wenten baya, kelugra ketepak tan pasadok ring prajuru.
2. Sang nepak tan sakaning pituduh patut gelis atur sepeksa ring prajuru maka buat panepake kadi ring ajeng.
3. Sapisira ugi nepak kulkul Desa Adat tan manut kadi ring ajeng patut keni pamidanda manut perarem
4. Sapunika taler kulkul-kulkul sane sewosan yan ketepak tan manut sulur patut keni pamidanda

Palet : 5

Indik Druwen Desa

Pawos : 45

Druwen Desa Adat menggah kadi ring sor :

- a. Pura Khayangan Tiga (Puseh, Dalem, Baleagung)
- b. Pura Mas Melanting Ayu
- c. Genah Bale Desa Adat Rauhing wewangunan lan telakjakannia
- d. Tanah Setra
- e. Tanah margi utawi rurung
- f. Tanah Pekarangan Desa
- g. Tanah laba Pura :
 Laba Pura Dalem Tegal 3 sikut, Carik asikut
 Laba Pura Puseh, Carik asikut
 Laba Pura Mas Melanting Ayu, carik asikut
- h. Gong apah barung
- i. Lembaga Perkreditan Desa Adat (LPD)
- j. Miwah sane sewosan manut dresta

Pawos : 46

1. Sehananing krama Desa wenang praktiasa ring druwen Desa sami manut ring ajeng
2. Bilih wenten druwen Desa sane ical, sang sapisira sane memanduang wenang keni pamidanda manut perarem saha ngewaliang pepanduung inucap.

3. Yening wenten druwen Desai cal nanging tan wenten ngangken ngambil patut kawentenang Pa Dewa Saksian manut pasuaran
4. Ritatkala wenten warga Desa polih nuduk barang mabuat, mangda atur sepeksa ring Prajuru
5. Prajuru ngerarisang nyiarang ring krama Desa, yan ngantos asasih tan wenten ngangkenin apah tiga ngeranjing ring Desa kalih pahan ring sang sane nuduk.

Pawos : 47

Sejeroning druwen Desa wigunan ipun keenterang olih Prajuru ngardi kesukertan Desa Adat manut pasuaran luire : pengaci ring Pura-Pura, ring Desa Adat lan wewangunan ring wewidangan Desa Adat Anjingan.

Pawos : 48

Indik Pamiara Druwen Desa

Wewidangan Desa Adat kapiara utawi kebersihin olih krama Desa Adat Anjingan luire :

- a. Ring Pura-Pura
- b. Ring Margi manut kewentenannyane
- c. Ring Setra

Pawos : 49

Tata trepti ngangge Setra :

- a. Yening wenten wang mendem ring setra Adat Anjingan, tan kelugra ngangge gegumuk semen wiyadin bebetonan
- b. Mendem sawa ring Setra Adat Anjingan tan kelugra langkungan ring dasa masa
- c. Yan ana wang lianan ring Agama Hindu tan kelugra mendem layon ring Setra Desa Adat Anjingan
- d. Utsahayang pisan setra inucap tetep kantung mahcina setra Hindu manut dresta.

Palet : 6

Sukertan Pamitegep

Kaping : 1

Indik Karang, Tegal lan Carik

Pawos : 50

1. Tanah karang Paumahan patut keayahang mekrama
2. Yan menten sinalih tunggil krama Desa pacang matimbang utawi nyiwadanaang tanah pekarangan Desa patut polih wakwakan sakeng warisnya tur polih pamutus sakeng prajuru Desa Adat manut pasuaran

3. Sehananing wewilangan karang, tegal lan arik sane wenten ring wewidangan Desa Adat Anjingan sekadi ring sor :
 - a. Wenten batas ipun
 - b. Mapemedal kemargine utawi karurung tan wenang kebebeng
 - c. Wenang kewehan sombah penguwas toyo
 - d. Sehananing karang, tegal lan arik mangda maguna marep sang nuwenang saha tan ngawinayang kedukkitan anak sewos
4. Wates karang ring ajeng patut ngangge tembok utawi pepageran wates sane kaler, sane kangin tur sane samping riring kadruwe tur kekaryanin olih sang ngelinggihin karang.
5. Yan wenten karang amput, patut kadruwe antuk Desa, tur keloktreang ring krama Desa, sane during ngawa karang
6. Yan pacang mekarya kandang wewalungan, miwah genah jejumlahan busana tan wenang nampek ring Perhyangan, Merajan utawi Pura. Genah jejumlahan busana paling kidik paembanganyane adepa agung, semalihne tan patut majejumlahan ring penyengker margi utawi rurung piranti-piranti patut kapiara olih sang madruwe ngantos tan pekanten kawon utawi ngewetuang pangleteh.
7. Krama Desa tan patut ngelahlah tanah pekarangan tegal lan carik paderben anak sewos, napi malih sane kadruwe antuk minakadi linggih Khayangan Setra, Margi miwah sane sewosan
8. Prade wenten karama Desa melaksana kadi ring ajeng katiwakin pamatut luire :
 - a. Ngewaliang tanah sane kelahlah
 - b. Ngewehin prebiya kadi patut sahe mapahayu
9. Yening wenten telajakan karang patut kapiara sang madruwe pinih becik ketandurin sane ngemedalang wiguna utawi keasrian wewidangan.

Kaping : 2

Indik Kekayonan

Pawos : 51

1. Yening wenten sinalih tunggil krama Desa nandur nenem tuwuh madedampingan ring genah Perhyangan wiyadin paumahan paembang ipun sakeng penyengker patut paling kidik adepa agung (2 meter)
2. Yening wenten kekayonan sane kapitahen pacang ngerauhang baya ring anak sewos luire ngungkulin, akah ipun ngerusak tembok penyengker wiyadin tembok wewangunan, kekayonan punika kangkat katundung.
3. Yening sang madruwe kekayonan tan nyuken nundung sang manundung wenang nunas upesaksi ring Klian Adat yening taler tan kedagingin, riwekas yening kekayonan

- punika ngerubuhin kepatut sang madruwe kekayonan punika meikang kadi nguni tur ngupekarain manut Agama
4. Prade wenten wang ngbah taru ngerubuh pekarangan lan pepayonan anak sewos kepatut sang ngebah sareng sang mapituduh mecikang wiyadin ngpekarain manut Agama
 5. Yening wenten taru pungkut kekarang anak sewos tan ngewetuang baya, sane madruwe karang punika patut melungguhang arep ring madruwe taru punika mangda gelis kegingsiran. Yening tan kerunguang olig sang madruwe ngantos tigang rahina wit melungguhang taru ika wenang ketaban seakweh taru ika ngelintangin.
 6. Yening taru pungkut ika ngewetuang baya minekadi nepen umah, merajan, miwah sane lianan, patut sane madruwe taru punika mecikang utawi ngupakarain manut Agama
 7. Bilih wenten tetanduran ebtikan ipun nglimbak utawi ngelintangin ke karang tegal lan carik anak sewos wenang kataban olih sang madruwe karang, tegal carik sane kaungsi olih entikan punika.

Kaping : 3

Indik Wewalungan

Pawos : 52

1. Sehanan warga Desa sane mamiara wewalungan patut sayaga nitenin wewalunganne, negul, ngelogor (melengbeng) mangdane tan ngerurakin karang utawi pabiyanan anak sewos napi malih ngantos ngeletehin khayangan
2. Prade wenten wewalungan melumbar ngantos ngerusakin pekarangan utawi pabiyanan risampune kepelungguhang kengin ketaban kesadokang ring prajuru. Prajuru wenang mamidanda sang nerebenang manut perarem tur kepatutang naur penebes sane kerusakang.
3. Prade ngeletehin patut keni pamidanda tur saha ngupekara Khyangan inucap manut Agama
4. Tan wenang ngangonan utawi negulang wewalungan ring genah-genah kadi ring sor:
 - a. Genah-genah suci
 - b. Margi ageng lan rurung
 - c. Setra
 - d. Tanah carik utawi tegak druwen Desa Adat
5. Prade wenten nenten tinut kadi kecap ring ajeng patut keni pamidanda manut perarem.

Kaping : 4

Indik Wewangunan

Pawos : 53

1. Sehanan warga Desa tan kapatutang mekarya wewangunan nyeap kepekarangan anak sewos
2. Yening wenten karang kabebeng patut kewehin rurung paling alit ammeter
3. Tan kapatut majejemuhan barang napi luih ring wewidangan Bale Desa Adat miwah ring margi agung
4. Tan kepatut ngenahang barang padruwen ring margine
5. Tan wenang mekarya wewangunan ring kakuwub margi
6. Yan wenten kekayonan sane naonin margi rurung, sinanggeh pacang ngewetuang baya wiyadin nyelengkadin aak memargi wenang kekayonan punika kesepatgantungin katebteb sane ngalintagin
7. Sehanan margi sane wenten ring wewidangan Desa Adat kepatut polih pitulung miara olih krama manut telajakan karang paumahan soang-soang pinaka penyanggra keasrian wewidangan Desa Adat.

Kaping : 5

Indik Baya Lan Dusta

Pawos : 54

1. Sehanan laksana sanetan rahayu sane mewesana ngawinang pakobet, duh lita dusta kerta, ring wang utawi ring krama Desa sinanggeh baya, wang sane ngawinang baya kasinanggeh dusta
Sane kasinanggeh baya “panca Baya” ngaran luire :
 - a. Jiwa baya : Keamuk, Kebaak
 - b. Arta baya : Kemalingan
 - c. Raga baya : Kepelegandang, Keperikosa
 - d. Geni baya lan toya baya : Puun, Belabar
 - e. Dura cara ring Agama : Ngerusak, wakparusia wiyadin memandung barang sane sinanggeh suci

Pawos : 55

1. Sehanan warga Desa sane katiben jiwa baya mangda gelis atur supeksa ring prajuru utawi sang wenang memawosin
2. Sehanan warga Desa sane uning wenten jadma melaksana dusta mayanin patut gelis atur supeksa ring prajuru

3. Sehanan warga Desa patut sayaga mapitulung ngerembe, manut kawentenan baya punika tur patut merembe sang keni baya manut dukkitan nyane, sih dane miwah sewosan mangdane presida polih katulungan
4. Sehananin warga melaksanan dusta, ngawinang baya patut keni pamidanda katiba ring sang kabayanin tur katur ring pemerintah agung

Pawos : 56

1. Sehanan warga Desa kamalingan, patut gelis atur sepeksa ring prajuru, yan pacang maseserep arta baya patut nunas panguwek dumun ring prajuru Adat utawi Kepala Dusun
2. Maseserep tiyos bebanjaran utawi Desa patut polih panguwek ring prajuru utawi Klian Banjar inucap
3. Prajuru patut nuntun mangda tingkah maseserep manut ring sesana wiyadin Awig-Awig
4. Sane kasinanggeh dusta patut newaliang arta baya punika tur keni pamidanda manut perarem

Pawos : 57

1. Yening wenten warga Desa kepelegandang, keparikosa sane uning patut premangkin atur supeksa ring prajuru, sane memaksa melegandang kesinanggeh dusta
2. Prajuru gelis jagi meraktiaksayang paindikan punika yening tan patut sekadi daging Awig-Awig punika patut kapalasang sane melaksana dusta patut keni pamindanda manut perarem.

Pawos : 58

1. Indik geni baya :
 - a. Sehanan warga Desa dane ketiben geni baya (kebakaran), warga Desa sane uning gelis medal ngerembe mapitulung utawi nyuaraang kulkul, saha gegawan mangda sang keni baya polih katulungan
 - b. Sesampune baya punika mewasta puput prajuru patut maritetes kewentenan baya punika medasar antuk tri premana
 - c. Yening kasinanggeh baya punika kabuat olih jadma dusta patut keni pamidanda manut perarem
2. Indik toya baya :

Prade wenten wang ke toya baya minekadi : anyud miwah sane lian-lianan, patut polih pengerembe olih warga Desa

Pawos : 59

1. Yan prade wenten mayanin, ngerusak utawi memaling barang sane kasinanggeh suci wang inucap patut keni pamidanda. Ngewaliang utawi mecikang sane kebayanin tur mapewewehin pengaksara caru utawi prascita manut Agama
2. Yan wenten wang nguman-nguman, wak parisia, wak cepala, kroda, mayuda ring pura wang inucap patut keni pamidanda manut perarem
3. Sang melaksana dura cara ring Agama prade kacihnan manut tri premana wang inucap patut keni pamidanda penegteg aksara
4. Yang dusta sakeng dura Desa yan kejuk patut ketaban raris keaturang ring pemerintah agung

Kaping : 6

Penyanggrahan Desa

Pawos : 60

1. Yening sinalih tunggil krama Desa Adat Anjingan ngwentenang karya ala utawi ayu patut kesanggra olih krama Desa manut pinunas sang meyadnya
2. Yening karya punika marupa karya ala utawi Pitra Yadnya patut kerembe olih krama Desa manut dresta sane sampun memargi
3. Yening karya punika karya ayu patut kerembe olih Desa manut pinunas sang meyadnya
4. Presajin sang madruwe karya arep ring krama Desa sasidan-sidan, manut kawentenan sang madruwe karya
5. Yening wenten karam Desa Adat Anjingan pacang ngingsirang wewangunan upami Bale Gede, jeneng, miwah sane sewosan patut kesanggra antuk Desa manut pinunas krama.

SARGA : I

SUKERTA TATA AGAMA

Palet : 1

DEWA YADNYA

Pawos : 61

1. Pura-Pura sane keempon olih Krama Desa Adat Anjingan tur Pujawali Pura-Pura inucap kadi ring sor :
 - a. Pura Khyangan Tiga
 - Pura Puseh Buda Kliwon Ugu
 - Pura Baleagung Buda Kliwon Ugu
 - Pura Dalem/Penataran Agung Sukra Paing Paang

- b. Pura Mas Melanting Ayu, Buda Kliwon Ugu
2. Pura Paibon, Merajan utawi Dadia :
 - a. Pura Merajan warga Dewa Desak Kartini
 - b. Pura Merajan warga Dewa Ngakan Made Japa
 - c. Pura Merajan warga Dewa Ngakan Putu Narka
 - d. Pura Merajan warga Sang Guru Warni
 - e. Pura Dadia Pulasari warga Pan Suartama
 - f. Pura Dadia Pulasari warga Pan Siarta
 - g. Pura Dadia Pulasari warga Ketut Nastera
 - h. Pura Dadia Pulasari warga Pan Suama
 - i. Pura Dadia Pulasari warga Pan Sedani
 - j. Pura Panti warga Tangkas
 - k. Pura Dadia Tangkas warga Pan Darma
 - l. Pura Dadia Pasek warga Pan Porni
 - m. Pura Dadia Pande warga Pan Budiasa
 - n. Pura Dadia Cameng warga Wayan Suparka
 - o. Pura Dadia Dauh warga Pan Murdana
 3. Pengemong muah pengempon Pura-Pura inucap ring ajeng luire :
 - a. Pura Khayangan Tiga (Puseh, Dalem, Baleagung), Pura Mas Melanting Ayu, yadnya lan wewangunan keempon olih krama Desa Adat Anjingan
 - b. Pura-Pura Merajan utawi Dadia, yadnya lan wewangunan keempon olih kulewarga manut sekadi pipil Pura inucap

Pawos : 62

1. Ring soang-soang Pura Desa Adat inucap ring ajeng wenang kewentenang Pemangku sane pacang ngenterang/nuntun sehananing yadnya/pengastawa ring Pura-Pura inucap Wiwitania sang dados Pemangku luire :
 - a. Mawiwit sakeng keturunan Pemangku ring pura inucap
 - b. Yan tan ana sakeng keturunan wenang nyanjan
 - c. Sang cendangga tan wenang dados Pemangku
 - d. Sang amungpang paraning laku tan wenang laku tan wenang dados Pemangku
 - e. Kesungkemin olih krama Desa
 - f. Pawitenannia kepuputang olih Ida Sang Sulinggih (Ida Pedanda)
2. Yan sampun wus pawintenannia wenang ngerangsuk “Gegalaran Pemangku”, patut kaping singgih manut wigunannia ngemargiang swadarmaning Pemangku tur tan ngelempasin sastra lan Agama

Pawos : 63

Swadarmaning Pemangku luire :

- a. Aswaka Dharma astiti bakti ring Sang Hyang Widhi
- b. Ngenterang wiyadin ngastawayang sehanan upekara ring Pura ritatkala patiran utawi yadnya sane sewosan upekara ring Pura
- c. Ngelaksanayang sane mabuat suci ring pura kalaning nedunang utawi ngelinggihang Ida Bethara
- d. Nuntun krama Desa mangda setata bakti ring Sang Hyang Widhi manut kecaping Agama
- e. Pemngku-Pemangku Desa wenang nyiratang Tirta ring krama Desa
- f. Nganutin “Tatat Kramaning Dadi Pemangku Widhi” sane mungguh ring Kesuma Dewa
- g. Pemangku istri kewenang ngenterang pайдikan banten upekara ageng wiyadin alit manut pemargi wali ring Pura-Pura utawi ring Ngusaba Desa Adat
- h. Pemangku paibon utawi Merajan kewenangannyane wantah ring Paibon utawi ring Merajan soang-soang
- i. Para Pemangku sejeroning wicara, tan kepatut muputang upekara
- j. Para Pemangku tan kepatutang olih Krama Desa muputang upekara yadnya sane kantun sejeroning wicara

Pawos : 64

1. Ritatkala ngeterang yadnya ring Pura Desa Adat Pemangku Pura inucap patut polih pengerembe sakeng Pemangku-Pemangku Desa sewosan tur patut niwakin pituduh ring Pemangku pengerembe inucap
2. Rabin soang-soang prajuru patut ngerembe ngenterang yadnya ring Pura-Pura utawi Ring Desa Adat
3. Yan prade Pemangku sane marep keni kapialang jantos tan presida ngemargiang upekara ring Pura, patut upekara kemargiang olih Pemangku Desa sewosan utawi Ida Sang Sulinggih (Ida Pedanda)
4. Yan ana Pemangku keni ujar ala, alah ala, Pemangku inucap patut keperascita manut Agama, sang maweh ujar ala, ulah ala patut keni pamidanda manut pararem
5. Yan ana Pemangku kebuktinyang amungpang paraning laku tan wenang kesepuh

Pawos : 65

Petitis lan olih-olihan Pemangku :

- a. Kaping singgih krama manut linggih tur sesanannia
- b. Luput ayah-ayahana Desa manut perarem

- c. Luput peson-peson upekara ring Pura inucap
- d. Polih pah-pahan sesari manut perarem
- e. Polih Cenengan (pematut) manut perarem
- f. Pawitenannia kesanggra antuk Desa
- g. Busana arangsukan kesanggra antuk Desa amasa apisan tatkala wali ageng ring Pura inucap
- h. Keupekara Pitra Yadnyanaia riwekasan yening sampun kebebsan olih sentanannia

Pawos : 66

- 1. Aturan-aturan pedagingan patut kadruwe olih Pura-Pura inucap
- 2. Sehanan sang sane maturing ring Pura inucap patut masedek ring Klian Pura aturan inucap patut keungguhang ilikita tur keuningang ring paruman krama Desa
- 3. Sehanan aturang kadi kecap ring ajeng, wenang keangge ring Pura inucap amnut tatujon

Pawos : 67

- 1. Ngentosin Pemangku mawiwit sangkaning ring sor :
 - a. Pemangku seda
 - b. Pemangku malih ngalap rabi, yan tan kesungkemin olih krama Desa
 - c. Pemangku keusanang olih krama Desa sangkaning kebuktinyang melaksanan dusta
- 2. Yan ana Pemangku keusanang wit sangkaning melaksanan dusta, yadian sangkaning pikayun ngeraga pacaang merarian patut keni pamidanda tur ngewaliang pematateka pawintenannia

Pawos : 68

Piodalan lang ageng alit acine ring Pura :

- a. Pura-pura sane keempon krama Desa Adat kadi kecap ring ajeng Piodalannya pindo pisan (ageng alit)
- b. Yening wali Ageng utamaning aci “Catur” tur kepuputang olih Ida Pedanda
- c. Yening wali Alit utamaning aci “Saji” kepuputang olih Pemangku Desa
- d. Tata cara pemargi aci ring Pura-Pura inucap manut kadi ilikita (pipi) ring soang-soang pura inucap ring ajeng

Pawos : 69

Kesukertan Khayangn kadi ring sor :

- a. Sehananing krama Desa patut nureksain raga mangda kesukertan Khayangan polih kesucian

- b. Sane tan kelugra ngeranjing ke Pura utawi ring genah-genah suci :
 1. Sang kasinanggeh cuntaka/sebel luire :

Ngeraje swala, ngembas putra, keruron, kelampusan, nyambut karya Pitra Yadnya ngawit sakeng ngerancang, pengantenan sadurung mesakapan miwah cuntaka sewosan manut pemargi
 2. Sang kasinanggeh cendala sadurung kepracista luire :

Panak babinjat, beling ten wenten ngengkenin, sadurung kaupekara jadma buduh, mamitra ngalang, sakit ila lan secancan cendala sewosan
 3. Mabusana sane tan patut manut tata susila lan Agama
 4. Sang sane makta bebuat sane kasinanggeh letih manut Agama
 5. Sehananing sane tan kepatutang manut Agama
- c. Sehananing pretingkah lan laksana sane tan dados ring Pura :
 1. Mesumpah utawi naap sor, sejawaning sangkan pituduh prajuru
 2. Meujar ala, ulah ala, wak parusia
 3. Mayuadi napi malih ngantos medal rah, mecikang wastra, mekollem lanang istri mesikian, macecepin rare
 4. Mekobetan, mewarih, mecikang pusung, miwah sane sewosan sane tan manut ring Agama
 5. Mangan kinom rauh ketaluan lan sehananing jajudian
- d. Sengker cuntaka manut kewentenan, kadi ring sor :
 1. Ngeraja swala : selamaning ngeraja swala ngantos mabersih ring raga
 2. Ngembasang putra : 42 rahina ngawit sakeng putranne embas ngantos sampun kaupakara makekambuhan tur maprasista manut Agama, yan sane lanang akepus odel rarene
 3. Keruron : 27 rahina ngawit sakeng karuron yan sane lanang 11 rahina
 4. Kelampusan cuntakannia sakeng kependem sekadi
 - 4.4.1. Sebel bebanjaran 3 rahina riwusan mendem
 - 4.4.2. Kelugrannia sajeroning bebanjarang sejabaning pekarangan ngantos 11 rahina
 - 4.4.3. Sang kelampusansejeroning pekarangan 27 rahina
 5. Sang nyambutin karya pitra yadnya cuntakannia ngawit sakeng ngerancang 3 rahina riwus yadnyannia
 6. Ritatkala nyambut karya ring Pura Desa, sane polih pialang wantah sang ngarepin kewenten
- e. Sane tan cuntaka sebelan kadi ring sor :
 1. Ida Sang Sulinggih (Ida Pedanda)
 2. Para Pemangku Khayangan

- f. Yan ana kebuktiang wenten krama sinalih tunggil melaksana sane kebawos ngelethein kadi kecap ring ajeng, wenang keni pamidanda lan pemerastan Khyangan inucap
- g. Yan Khyangan inucap ring ajeng keni kedurmanggalan kadi ring sor Panca Karubuhan, Kesiratan Rudira. Kehanan Wangke Santo Ageng, Ngawit Bawi Ngagengan, Wangkening Manusa, sehananing lulut lan simbar. Patut Pemangku digelis nyadokang ring Prajuru, mangda marumang Krama Desa Adat, pacang ngawentenang upekara sepatutnya manut panugrahan Ida Sang Sulinggih (Ida Pedanda)
- h. Yan ana Krama Desa, sinalih tunggil kerauhin ring pura patut digelis kapintonin olih prajuru antuk kaweruhan manut kecaping sastra lan Agama, muktiang jati tan jatinia sang kerauhan inucap, yan tan jati kerauhan patut keni pamidanda manut perarem
- i. Yan ana wang edan nyantos ngerusak ring Pura, wargan inucap patut mecikang sehananing sane karusak tur meperesista manut Agama
- j. Ritatkala kawentenang upekara yadnya ring Khyangan utsahayang pisan mangda wenten skehe kidung mangde nenten ngangge kaset duaning kaset kesinanggeh kirang manut ring kecaping Agama

Pawos : 70

Tata trepti ngeranjing ring Pura Desa Adat Anjingan utawi ring genah-genah suci :

- a. Yening pacang ngayah mekarya nabi luire ring Pura kepatut ngangge selepot sane lanang lan sane istri masesenteng
- b. Yening pacang matur bakti kepatut mabusana adat, (udeng), sane istri masesenteng, mapusung (mesanggul), yang mekewace ngangge kebaya
- c. Busana Pemangku Desa sarwa Putih
- d. Soang-soang krama patut nitenin raga indik kesucian warga soang-soang
- e. Anak alit sadurung polih magundul (makutang bok) tan dados ngeranjing ke Pura Khyangan Desa

Palet : 2

Rsi Yadnya

Pawos : 71

Ida Sang Putus sane keadegang pinaka Siwa (Guru Loka Pala Seraya) antuk Desa patut kadi ring sor :

- a. Upekara pediksaan lan pretiwan Ida riwekas kelaksanayang olih krama Desa sisian Ida Pedanda
- b. Pinaka penuntun krama Desa indik tatwa lan Agama
- c. Muputang upekara ring Khyangan utawi upekara ring krama Desa

- d. Pinaka Kerta Desa patut metetiwak pengaskara ring krama Desa
- e. Pinih singgih linggih Ida tur krama Desa patut ngaturang bojana
- f. Ida Pedanda tan kepatutang olih krama Desa muputang upekara (Yadnya) sane kantun sejeroning wicara

Pawos : 72

1. Prajuru yogya nuntun krama Desa misinggihang/mikukuhang sang para Wiku, para Pemangku lan sesana sane manut linggih Ida
2. Krama Desa Patut ngaturang punia ring Ida Pedanda ritatkala wus ngaturang pamuput yadnya
3. Krama Desa patut mateleb nunas ring Ida Sang Wiku, muah sang sujana sane prasida mawesana kesutreptianing Desa manut kecaping Agama
4. Ritatkala Ida Pedanda madruwe karya, krama Desa patut ngaturang ngayah
5. Sapunika taler indik ngaturang ayah utawi punia ring Ida Sang angawa Rat (Dalem) ring Puri Klungkung taler kesanggra olih krama Desa

Pawos : 73

1. Krama Desa ketuntun olih prajuru wenang nitenin separipolah sang muput yadnya
2. Mangda sehanan yadnya sane kawentenang manut ring kecaping Agama
3. Mangda tan nyasar laku, lan manut ring swadrmaning muah sesanannia

Pawos : 74

1. Yening wenten krama Desa mapodgala utawi madwijati sadurunge patut polih panugrahan sakeng Inda Sang Putus pinaka siwa, utawi penugrahan sakeng Parisada Hindu Dharma lan Kantor Agama, maka cihna sang pacang medwijati inucap sampun wus ketitenin, ktureksain, indik sehanan paweruh lan pawongannya tan ngelepasin kadi kecap sastra Agama, dresta lan sesana sane pacang kemargiang.
2. Prajuru patut nitenin/nureksain mungguhing kewentenannya, laksana sang mepodgala mangda jati tan lempas ring kecaping Agama
3. Risampun puput upekarannia tur nabes Ida sampun mapaica parab, prajuru patut ngawedar indik lan pemargi sang putus medwijati
4. Sang madwijati inucap pacang ngemargiang nyoteng, nalang miwah sane lian-lianan manut Agama, prajuru wenang nyaksiang upekarannia, tur wenang ngawedar indik tetujon pemargin sang inucap, rauhing ring wates wewidangannya
5. Yan prade wenten sane tan manut nabi malih nyasar laku medasar tri premana nabennia patut ketunasin pemutus sane patut

6. Tatiwak Sang nabe sane sampun kesanggra/kekukuhang olih sang rumawis pinaka pamutus sani pinih pastika

Palet : 3

Pitra Yadnya

Pawos : 75

1. Sehananing upekara pemereteke wang lampus kebawos Pitra Yadnya sekadi : Mersihin sawa, mendem sawa, ngeseng (atiwa-tiwa), ngerorasin rauh ngelinggihang ring Perhyangan Dewa Sang Pitra
2. Mendem sawa utawi ngeseng :
 - a. Genah ngeseng/mendem ring setra ugi
 - b. Ida Pedanda polih linggih manut dresta
 - c. Pemargi padewasan mendem utawi atiwa-tiwa medasar panugrahan Ida Pedanda, taler nganutin Desa, Kala, Patra manut dresta
 - d. Mendem, atiwa-tiwa miwah pengtanganniatan kelugra ring rahina : Pasah, Prewani, Purnama, Tilem, Anggar Kasih, Buda Wage, Buda Kliwon miwah Tumpek
 - e. Yan prade sang kelampusan kawentenannia kobet, kelugra mekingan premangkin. Pemargine sasiliban, tan nyuarayang kulkul tan paupakara, tan meprakpak tur tan ngangge gegumuk
 - f. Yan ana krama kelampusan nemonin rahine ring Khyangan, pemargine mendem mangda sampun puput ngaturang wali, pemargine sesiliban
 - g. Tan dados nekung sawa langkungan ring pitung rahina

Pawos : 76

1. Prade wenten wang lampus sangkaning salah pati, ulah pati kengin kebakta budal tur kesanggra antuk banten pengulapan lan penebusan upekara pemeretekannia nganutin penugrahan Ida Pedanda
2. Yan ana wang istri mobot lampus, tan wenang kependem sadurung bobotannia embas
3. Prade wenten wang padem ring carik, tegalan, sang madruwe kepatutan utawi warisnya patut keni pemerassista lan pecaruan manca sata kelaksanayang ring genah inucap masengker asasih pitung rahina
4. Yan wang padem inucap tan keni elingan wenang kepiuning ring pemerintah mungguhin upekara pemerassista kelaksanayang olih krama Desa utawi krama Subak
5. Yan ana ngangkenin wang padem inucap ring ajeng, sane ngangkenin patut keni upekara kaletahan inucap

Pawos : 77

1. Yan ana wang tan mekrama Desa Adat ring Desa Adat Anjingan kelampusan tur pacang mendem ring setra Desa Adat Anjingan, sejeroning megama Hindu kepatut :
 - a. Sadurunge patut atur piuning, nunas kebebasan ring Klian Adat
 - b. Wewanengan dados mendem wantah dasa (10) masa
 - c. Keni jinah penanjung batu mapawilangan 2.500 jinag bolong saha banten pejati penyanggra krama Desa
 - d. Tan polih penyanggra krama Desa
2. Yan ana wang tan mekrama Desa ring Desa Adat Anjingan pacang keabenang ring setra Adat Anjingan patut :
 - a. Sadurunge patut atur piuning, nunas kebebasan ring Klian Adat
 - b. Keni jinah penukun setra mepewilangan 1.250 jinah bolong asawa
 - c. Keni pemerassista lan pecaruan ring sewengkonin Desa Adat Anjingan manut dresta
 - d. Tan polih penyanggra sakeng krama Desa
3. Yan wang mapinunas kadi kecap ring ajeng, pacang medem utawi ngaben, Klian Adat patut marumang krama Desa Adat nguningang pinunas utawi pemargin wang inucap

Pawos : 78

Swadarmaning krama ritatkala kelayuan :

- a. Krame sane madruwe kelayuan, patut digelis nyadokang ring Klian Adat pacang nunas tetimbang indik tetujon pemargin manut kewentenannia
- b. Prajuru mari tetes pemargin sang kelayuan manut kewentenannia tur nyuarayang kulkul
- c. Prade pacang mapendem krama Desa Adat patut sayaga nedunin tur ngerembe sehananing karya sang kelayuan manut dresta
- d. Krama Desa Adat sane istri-istri patut medelokan ngerembe karya manut dresta
- e. Swadarmaning sang madruwe kelayuan nyanggra krama Desa asidan-sidan

Pawos : 79

Tata trepti ritatkalaning pemargi nganter sawa ke setra :

- a. Ritatkalaning nganter sawa ke setra, saluiring sane nututin tan dados ngelangkungin sawa
- b. Pemargine magda trepti tur dabdad tan wenang mewig-wigan utawi ngarap mapan tan manut ring Putusing Parisadha napi malih ngerusak sekadi : Wadah, pemereman, sawa miwah sane lian-lianan ngantos ngewetuang pekeweh ring sang madruwe kelayuan. Yan ana krama Desa mamurug kecaping iki wenang kenit pamidanda manut perarem.

- c. Mungguhing runtutan pemargine sakeng ajeng :
Upekara banten, sawe, kekawin, para istri-istri, tur pinih unkur lanang-lanang nyane saha tetangguran
- d. Sehanan krama sane ngamiletin patut mabusana Adat
- e. Sesampune rauh ring setra tan dados matinggal sadurung wenten atur sakeng prajuru utawi sane madruwe kalayuan.

Pawos : 80

Tata cara ngangge tunon/setra :

- a. Sang pacang ngangge tunon/setra patut nunas kebebasan sakeng prajuru (Klian Adat)
- b. Tatane ngangge tunon/ setra manut kadi dresta miwah pituduh prajuru inucap
- c. Wang desane sami mangda nitenin, mangda sehananing letuh setrane tan wenten ngelalah/kebakta ke Desa Pakraman, bilih-bilih ke Khyangan
- d. Wang desane sami tan dados ngerereh barang sane kebawos leteh bakta ke pekraman utawi ke carik
- e. Yening pelebon/ngagah sawa ring setra nganutin panugrahan Ida Pedanda.

Pawos : 81

1. Pematius wenten 3 soroh :

a. Patius Masa

1. Krama Desa Adat medal patur luire :

Ajengan apunjung, turus asiki, papah linggir asiki, kelabang akuwub lan kelapa abungkul

2. Keama Desa nyanggra karya rauh puput

3. Krama Desa nyanggra karya ngosong ping 3 (tiga) sang madruwe karya ngaturang canang kewenten tiyos ring punika tan kepatut

4. Ring pengutangannya krama Desa medal patius ajengan polih linggih ping kalih lanang istri

b. Patius Dadakan

1. Krama Desa Adat medal patius luire :

Ajengan arirang, kelapa abungkul

2. Nyanggra karya ngosong ping 3 (tiga)

3. Ring pengtangannya medal patius ajengan tur nyanggra karya rauh puput

c. Patius Sumbangan :

1. Beras akobokan, kumpulan ring Bale Desa Adat olih Prajuru

2. Nyanggra karya ngosong ping 3 (tiga)

3. Krama Desa Adat ngerembe ring mersihin sawa tur ngerembe pemargine nganter sawa ke setra
4. Pemargi tiyosan pasuka-dukan
2. Krama Desa sane pacang ngelaksanayang pelebon/ngaben ngagah (ngaben masa) paling kidik 21 (selikur) rahina sadurung padewasannya sampun puput kebawos ring prajuru tur marumang krama Desa. Patus sane kelugra patus masa.
3. Krama Desa sane pacang ngelaksanyang ngaben/pelebon dadakan (bah premangkin) kelugra patus dadakan utawi pautus sumbangan manut pinunas krama sane kelayuan
4. Indik pemargin penegen (penyandang) bade, wadah miwah pemereman tiyosan muncuk ring semeton dumun wus punika wawu krama Desa sewosan, manut dudonan.
5. Sianlih tunggil krama Desa Adat Anjingan, wantah dados nunas patus amasa apisan

Palet : 4

Indik Manusa Yadnya

Pawos : 83

1. Manusa yadnya inggih punika : upekara dharmaning manusa ngawita sakeng sejeroning garba wasaning ibu, jantos lampus riwekas
2. Upekara ring ajeng luire :
 - a. Megedong-gedongan
 - b. Wawu Embas
 - c. Kepus Odel
 - d. Ngelepas Hawon umur 12 rahina
 - e. Tutug Kambuhan (42 rahina) saha metusuk karna
 - f. Nelu Bulanin (3 sasih)
 - g. Aweton (6 sasih)
 - h. Tumbuh gigi (Ngempugin)
 - i. Mekepit Rambut (Mekutang bok)
 - j. Makupak (makentus gigi)
 - k. Menggah Deha/Taruna
 - l. Mepandes (potong gigi/metatah)
 - m. Mawiwahan
 - n. Mewinten/medwijati
3. Upekara inucap ring ajeng nganutin kecaping Agama : Nista, Madia, Utama, pemargine nganutin dresta miwah sima cara ring Desa Adat Anjingan

Pawos : 84

1. Sehananing wang ring Desa Adat Anjingan alaki-rabi kepatut :
 - a. Upekara pabiya kalaan
 - b. Upekara Wiwaha/mesakapan : lepas sebel kandel luire :
 1. Banten upesaksi ke surya
 2. Banten pabiya kalaan ring natah
 3. Banten upesaksi ring Pempatan Desa Adat
 4. Upekara inucap kesaksinin olih Klian Adat lan Kepala Dusun
2. Sedurung ngelaksanayang upekara inucap ring ajeng tan kelugra ngeranjing ring Pura-Pura panyiwian Desa Adat Anjingan
3. Upekara inucap ring ajeng kepuputang olih Pemangku Desa utawi Ida Pedanda
4. Banten upesaksi ring pempatan Desa Adat Anjingan : Peras Pejati, mesesari 125 jinah bolong lan kawisan atanding. Banten Pejati miwah runtutannia kadruwe olih Desa Adat Anjingan
5. Sang nagun karya inucap ring ajeng kepatutan mepejati kawisan ring Klian Adat akawis, ring Kepala Dusun akawisan
6. Klian Adat lan Kepala Dusun mangda nyaksiang pemargin upekara inucap ring ajeng

Palet : 5

Indik Butha Yadnya

Pawos : 85

Butha Yadnya inggih punika :

Sehanan upekara pabiya kalaan ring partiwi lan Kahyangan muang sarwa Buthakala luir ipun :

- a. Upekara pabiya kalaan ring sarwa perani luire :
 1. Sarwa tumuuh ring Tumpek Wariga
 2. Sarwa perani/ingon-ingon ring Tumpek Uye
- b. Upekaya pabiya kalaan ring pertiwi miwah Khyangan sarwa butha kebawos mecaru luire :
 1. Yadnya sesa : Ngejot kalaning wus maratengan
 2. Eka Sata, Manca Sata. Manca Kelud, Rsi Gana, Manca Sanak, Malik Sumpah
- c. Tilem Kesanga kewentenang “Tawur Kesanga” ring Pempatan Desa Adat Anjingan, Ageng Caru “Manca Sata” tur prajuru nunas Tirta ring Penyadnyan Banjarangkan manut tatiwak sakeng Parisadha
- d. Sejeroning menggah ring ajeng malih pabiyakalaan marep ring manusa manut wigunannia

Pawos : 86

Upekara Tilem Kesanga (Tawur Kesanga) patut kelaksanayang kadi ring sor :

- a. Melis ring Segara, tata cara manut dresta
- b. Rauh sakeng melis Ida Bethara nyejer ring Baleangung
- c. Pecaruan kewentenang ring Pempatan Desa Adat Anjingan, Ageng Caru Manca Sata miwah saruntutannia
- d. Nunas Tirta Tawur ring Payadnyan Banjarangkan
- e. Ring Soang-soang paumahan nganutin tatiwak sakeng Parasidha
- f. Ngewentenang pengerupukan mebuu-buu tur kapdabdabin olih prajuru miwah Pecalang
- g. Ring rahina penyepian patut ngemargiang berata penyepian sekdi :
 1. Amati Geni
 2. Amati Karya
 3. Amati Lelungan
 4. Amati Lelungan
- h. Pemargin berate penyepian Desa, Kala, Patra saha kantung olih prajuru utawi pecalang ngawit penyepian mahcina antuk suaran kulkul
- i. Sane memurug berate penyepian patut keni pamidanda manut perarem sejawaning sane polih lelugrahan manut kekobetannia saha ilikita lingga tangan prajuru
- j. Rahina benjangne semeng ngembak berate penyepian macihna antuk suaran kulkul
- k. Ring rahian pengembak geni, mapiteges ngembak berate penyepian patut ngawentenang pasima krama
- l. Pemargin pasiam-krama inggih punika :
 1. Para krama Desa sami tedun ring Bale Desa Adat
 2. Katuntun antuk Klian Adat (Bendesa Adat) miwah para prajuru sewosan mangda kramane sami saling nunas pangampura pada ngaksamayang raga. Ngilingang tingkahe mekrama wantah paras-paros salulung senbayan taka, maka cihna pangawit desawa Isaka Warsa

SARGA : V
SUKERTA TATA PAWONGAN

Palet : 1

Indik Pawiwahan

Pawos : 87

1. Pawiwahan inggih punika :
Penunggalan purusa lan predana (lanang istri) melarapan antuk panunggalan suka cita kadulurin antuk upesaksi sekala lan niskala
2. Pidabdab pawiwahan ring Desa Adat Anjingan ngemanggehang pemargin purusa, kapatut sang purusa sane ngalap rabi tur kepaumahang ring sang purusa
3. Pemargin pawiwahan wenten palih-palih ipun :
 - a. Pepadikan (kemanggala antuk pekraman)
 - b. Ngrangkat (ngerorod) pemargine sesiliban wus punika wawu kakrunayang
 - c. Nyeburin, sang wadon madewek purusa, kemanggehang dados sentana olih keluarganya, sane lanang dados predana
4. Pidabdab sang pacang mawiwaha luire :
 - a. Sane sampun menggah Deha/Teruna
 - b. Sangkaning suka cita lan tan keparikosa
 - c. Yan ngambil sewos Agama patut kemanggala antuk banten penyambutan
 - d. Nganten kecaping Agama
 - e. Mangda anut ring daging “Undang-Undang Perkawinan” sane kawentenang antuk pemerintah agung
5. Yan tan satinut kadi kecaping arep, tan kasinanggeh puput tur kepalasang raris keni pamidanda manut perarem

Pawos : 88

Tata caraning pererabian ring Desa Adat Anjingan luire :

- a. Pemargin indik pepedikan :
 1. Makruna pang tiga luire : Ngidih ping kalih ring ping tigane pengambilan
 2. Ring pengambilan keluarga sang predana ngerauhing Klian Adat pinaka saksi
 3. Risampune sane istri kepaumahang ring sane lanang, keluarga sang predana patut nyuarayang kulkul, ring rahinan punika
- b. Ngerangkan utawi ngerorod :
Sang sane ngambil anak istri patut ngemargiayang kadi ring sor :
 1. Masadok tan kasepan ring awengi
 2. Ngewentenang penglukuan pang tiga, manut tata cara saha dulurannya

3. Yan sampun manut keluargan sang istri masedek ring Klian Adat jaga nyuarayang kulkul
 4. Kulkul kesuarayang ring 3 rahina wus perorodan, kasep ring ika keluargan sang predana keni pamidanda nikel ring suaran kulkul
 5. Prade sampun ping 3 makruna panglukuannia during puput keluargan sang ngambil ragi wenang ngaturang pemargine ring Klian Adat. Klian Adat pacang nureksain painedikan punika, ring sang ngerorod lan keluargan sang predana, yan sampun manut kulkul kesuarayang olih Klian Adat 5 rahina wit perorodan
- c. Yan wenten anak ngambil istri ngunggahang wangsa, manut sekadi drestane ring Bali, sedurunge patut ngemargiang upekara “Pati Wangi” kesaksinin antuk Klian Adat, Indik banten marupa pejati saha dulurannya katur ring Pura Desa (Pura Baleangung)

Pawos : 89

1. Ageng penaur suaran kulkul 50 jinah bolong
2. Suaran kulkul ketaur olih keluargan sang predana yening keluargan san predana sampun arep tur nyuarayang kulkul
3. Yening keluargan sang predana tan arep ring pewarangan okane, kulkul kesuarayang olih Klian Adat, Suaran kulkul ketaur olih keluargan sang purusa

Pawos : 90

1. Sang kaicalan anak istri, yan durung wenten maseek sejeroning awengi patut masedek ring Klian Adat lan Kepala Dusun nunas mapitulung pacang maseserep
2. Klian nuntun pemargi kaseserep mangda nganutin tata kramaning Desa luire :
 - a. Keanter olih prajuru Desa
 - b. Ngeranjing kepaumahan sang maseserep tan dados langkungan ring 2 diri
 - c. Tan dados makta gegawan/senjata sejabaning petugas keamanan pemerintah agung
 - d. Tan kepatut ngemedalang bebawos sane tan nganutin tata susila
3. Yening pemargi maseserep nenten nganutin kecaping iki tan kalugra pacang maseserep, tur karauhan sang maseserep punika gelis keuningang ring petugas keamanan pemerintah agung

Palet : 2

Indik Nyapihan

Paows : 94

1. Sane kebawos nyapian inggih punika, Sang wus merabian (palas) tan sida satinut alaki rabi. Wus merabian sangkaning padem (seda) kebawos balu

2. Sang pacang nyapian sesampune polih pamutus ring pemerintah agung wenang kesiarang ring Desa Adat antuk Klian Adat sareng Kepala Dusun
3. Yan riwekasan sang nyapian malih adung tur mewiwaha patut kadulurin antuk pemerassista tur keni pamidanda
4. Yan ana balu mulih deha, riwekas malih mewali ngerereh sentanania patut keni pamidanda

Pawos : 95

1. Tata sulur pacang palas merabian wenten sangkaning :
 - a. Pada lila pacang nyapian (palas)
 - b. Sangkaning wicara utawi pretingkah sewosan sane ngawinang tan presida adung merabian
2. Yan prade palas sangkaning lila cita, sang nyapian kepatut kadi ring sor :
 - a. Naur prebiya ring sang rumawos
 - b. Polih pahpahan paguna kaya (atengen asuwun)
 - c. Pebekelan mewali niri-niri
 - d. Wewarisan lan sentana kekuasa antuk sang purusa tur kepatut nguwehin pengupa jiwa lan keweruhan ring sentana
 - e. Keputus olih prajuru Desa tur kesiarang ring paruman Desa
3. Yan prade nyapian tan pada lila, wit sakeng wicara luire :
 - a. Anyasar laku, dreti krama
 - b. Wak parusia wiraseng laku
 - c. Macacala matilar tan pasadok langkungan ring 6 sasih
 - d. Kepatut olih pemutus sakeng pemerintah agung

Pawos : 96

1. Balu luh katinggal lampus antuk suaminia patut ngemargiang swadarmaning balu kadi ring sor :
 - a. Ngemargiang kepati beratan tan dreti krama
 - b. Ngemargiang sehanan ayah krama
 - c. Ngeraksa tur nguasayang lan miara sehananing wewarisan lan sentana
 - d. Tan kengin ngadol wewarisan sedurunge polih wakwakan sakeng kulewarga lakine kepurusa
 - e. Kawenang malih mawiwaha yan sampun kepaigumin antuk oka lan kulawarga kapurusa
2. Balu sane tan pageh ring swadarmaning balu luire :
 - a. Metingkah dreti krama miwas sane sewosan

- b. Metilar tan pasadok langkungan ring 6 sasih
 - c. Lempas ring swadarmaning balu utawi slah prewerti
3. Balu sane tan pageh kadi kecaping arep, wenang ketunding olih kulewargannia purusa saha tan polih pahpahan paguna kaya lan warisan sewosan
 4. Prade wenten balu luh tan pesentana utawi masentana pageh ring swadarmaning balu, katundung olih wargannia kapurusa patut polih pahpahan paguna kaya lan bebekelan mulih niri-niri

Palet : 3

Indik Sentana

Pawos : 97

1. Sentana inggih punika :
 - a. Sentana purusa (prepti sentana) sentana sane kewetuang sakeng pawiwahan kapurusa manut agama
 - b. Sentana rajeg, sentana sane kewetuang sakeng pawiwahan wadon ngawa linggih purusa, manut Agama
 - c. Sentana peperasan, sentana antuk ngedih kadulurin antuk upeksaksi sekala lan niskala manut Agama
2. Sentana rajeg :
 - a. Predana kerajegang ngawa linggih purusa
 - b. Sane lanang nyeburin ngawa linggih predana
 - c. Katurunannia nganutin predana ngawa linggih purusa
3. Pemargin sentana rajeg :
 - a. Pawiwahan kelaksanayang ring paumahan sang wadon sane ngawa linggih purusa
 - b. Sane lanang megama Hindu tur nyadia nyeburin
 - c. Kukul kasuarayang olih kulewarga sang lanang sane ngawa linggih predana
 - d. Sang lanang madewek predana tan kapatut malih mawiwaha
 - e. Sang ngadegang sentana rajeg patut polih wakwakan sakeng kulewargannya predana ngawa linggih purusa
4. Sentana peperasan :
 - a. Anak sane ngawa linggih oka sah
 - b. Ngawit peperasan sang keperas kaicalan linggih waris ring umah asalnya tur polih linggih waris sah ring wang sane meras
5. Pemargin sentana peperasan :
 - a. Megama Hindu sadurung alaki rabi
 - b. Kaperas sakeng pancer kepurusa

- c. Sinalih tunggil mawiwit sakeng kulewarga tunggal sang utawi marajan, paibon, dadia
- d. Yening tan wenten sakeng pancer kapurusa kadi kecaping arep dados sakeng predana
- e. Yening taler tan wenten sakeng predana utawi pernahane kecaping dados ring sapasira ugi.
- f. Sang sapesira pacang memeras oka utawi ngidih sentana sadurungne patut masadok ring Klian Adat
- g. Klian Adat digelis nyiarang ring krama Desa sami ngantos ping 3 sawilang asasih
- h. Yening sampun tutug sengekeripun 3 sasih Klian Adat ngicenin pamutus manut kadi kewentenannia
- i. Parade wenten keberatan patut nyadokang ring Klian Adat sadurung tutug sengeker, Klian Adat patut mawosin manut kawentenannia
- j. Sejeroning kantung wicara tan kelugra ngemargiang upekara peperasan
- k. Yening jagi wenten kewentenang peperasan tan kepatut ngencak patus
- l. Dehe tua utawi kangkat ngedih sentana yan sampun manut kadi kecap ring ajeng

Pawos : 98

Peperasan punika sinanggeh sampun puput (sah) yening sampun macihna

- a. Pawidhi - wedhanaan peperasan kapuputang olih Ida Sang Sulinggih (Ida Pedanda)
- b. Kesaksiang olih Klian Adat lan Kepala Dusun saha kasarang ring paruman Desa
- c. Naur jinah upesaksi mapewilangan 500 jianh bolong, ring Desa Adat
- d. Wenten saha kewehin ilikita ungguhan tata sulur peperasan
- e. Nunas Penetapan Pengadilan lan Akta Pengangkatan Anak sakeng Pemerintah Agung
- f. Yening wenten sinalih tunggil krama Desa meras oka (ngedih sentana) tan manut kadi kecap ring ajeng tan kasinanggeh sah ring Desa Adat Anjingan

Palet : 4

Indik Warisan

Pawos : 99

1. Sane kasinanggeh warisan inggih punika :
Harta guna kaya, harta tetatadan, harta pusaka, jiwa dana, karang paumahan, sanggah utawi merajan, utang piutang, pitra yadnyannia sang kewarisin rewekas rauh ayah-ayahan Desa
2. Sane kebawos waring inggih punika :
Prepti sentan, sentana rajeg, sentana peperasan
3. Prade tan wenten sekadi ring ajeng, sang kasinanggeh waris :

- a. Keturunan sakeng pancer kapurusa
- b. Yening tan wenten sakeng pancer kepurusa, kangkat sakengtunggal sanggah, merajan utawi dadia
- c. Yening tan wenten pacang ngewaris kadi ring ajeng, kadruwe antuk Desa, risampune polih kawedarang ping 3 sawilang asasih
- d. Sang sapasira pacang nimbali (ngulihin) karang inucap punika kepatut ngupekara pitra yadnyannia saha ayah-ayahan Desa

Pawos : 100

1. Swadarmaning waris kepatut :
 - a. Nerima saha ngusahayang tetamian, ayah-ayahan, minakadi ngerempon sanggah, pura dadia, Pura Khyangan saha ayah-ayahan Krama Desa.
 - b. Upekara pitra yadnya sang kewaris riwekas sepatutnya
 - c. Nauring seutang-utang sane sewosan
2. Sadurunge puput swadarmaning waring kadi kecap ring ajeng tan kelugra nyiwa danaang harta berana wewarisannya

Pawos : 101

Ahli waris tan polih pahpahan waris yen prade ipun :

- a. Merupa sentana rajeg sane sampun sah ninggal kedaton
- b. Marupa sentana lanang sane sampun nyeburin kepekurenan lian
- c. Sentana waris sane nilar Agama Hindu

Pawos : 102

Sane kangkat ngewars pamupu kemawon :

- a. Balu luh
- b. Malu Muani sane ngawit sakeng wiwaha nyeburin
- c. Sang mulih Deha seantukan ring pawiwahanne dumun sampun kaucap ninggal kedaton
- d. Sekantun maurip patut kewehin jiwa tatadan utawi bekel maka cihna paweweh ring pianak sane kesah mawiwaha
- e. Padgata kala kawentanang pedum waris, yening wenten istri deha patut polih waris apah tenga ring duman sane lanang (ategen asuwun)

Pawos : 103

Prade sejeroning kulewarga wenten waris langkungan ring adiri kepatut :

- a. Kewentenang paigum indik pedum waris inucap
- b. Yan tan presida muputang tetimbang ring paumahan patut nunasang tetimbang ring Klian Adat

- c. Prade taler tan wenten nganutin penepas Klian Adat, kengin nunasang ring Kertha Desa Adat
- d. Prade malih ring Kertha Desa Adat tan arep kengin nunasang ring sang rumawos Adat
- e. Risampune nunasang ring sang rumawos Klian Adat dados saksi nganutin daging Awig-Awig
- f. Indik prebiya pemargin Klian Adat pinika saksi kesanggra olih sang ngelanturang wicara

SARGA : VI

WICARA LAN PAMIDANDA

Palet : 1

Indik Wicara

Pawos : 104

1. Sane patut mutusang wicara ring Desa Adat Anjingan inggih punika :
Klian Adat lan Kepala Dusun
2. Pamutus indik bebawos nganutin daging Awig-Awig, petitis lan pamikukuh Desa Adat Anjingan
3. Prade wicara inucap tan presida mikolihang pemuas antuk Klian Adat lan Kepala Dusun, wicara punika patut katur ring Kertha Desa Adat
4. Prade malih ring Kertha Desa Adat tan presida mikolihang pamutus, wicara punika katur ring pemerintah agung rumawos Adat

Pawos : 105

1. Sehananing wicara sane ngewetuang laksana corah, baya, nungkas Awig-Awig kebawos anggusak-asik Desa, Ptut kebawos antuk prajuru utawi Klian Adat tur keni pamidanda manut perarem
2. Sehananing wicara nyawang gara wiadin ngewetuang bawos kawon, ngewetuang manah sungsut ring krama Desa utawi ring anak sewos patut digelis kebawos olih prajuru sesampune wenten nyadokang
3. Pamutus antuk prajuru utawi Klian Adat patut pastika, nyantenang kaiwanganya mangdane tan lempas ring daging Awig-Awig Desa Adat punika
4. Prajuru utawi Klian Adat patut nganinin pamidanda ring sang mawicara sane sisip utawi ring sang sapesira ugi sane lempas ring daging Awig-Awig puniki manut perarem

Palet : 2

Indik Pamidanda

Pawos : 106

1. Krama Desa Adat Anjingan wenang niwakang pamidanda ring krama sane sisip
2. Indik patetiwak pamidanda patut kelaksanayang olih Klian Adat utawi prajuru Desa Adat
3. Ageng-Alit pamidanda wenten bacakan ipun sekadi munggah ring sor :
 - a. Panca pamidanda :
 1. Nebas kesisipan kaiwangannya nguni
 2. Tulak wali 500 jinah bolong
 3. Tulang mincir 500 jinah bolong
 4. Penyagsag wirasa 500 jinah bolong
 5. Titian Mase 500 jinah bolong a mase
 - b. Pamidanda sewosan luire :
 1. Ayah-ayan panukun kesisipan
 2. Danda Arta (dedosan saha panikelnyane utawi panikel paturunan)
 3. Pengupekara lan pengaksara
 4. Perampagan (melelang)
 5. Angusak-asik Desa utawi Angrugada Desa 1.000 jinah bolong
4. Indik pamidanda jinah bolong kawilangin antuk pemargi sane ketah ring Desa Adat Anjingan
5. Jinah utawi raja brana sakeng pamidanda ngeranjing dados druwen Desa Adat

Pawos : 7

1. Yan ana sinalih tunggil krama Desa, tan naur peturunan utawi dedosan ring panamaya patut naur (panamaya muput) patut keni panikel apah tengge
2. Ring panamaya wewanengan nyane (malih tigang rahina) teller tan presida ketaur patut nikel tur ketaur malih asangkepan
3. Yening sampun nikel, ring panamayannya pacang naur tan presida kataur patut nikel nikel ngulung raris ngemargiang rerampagan
4. Tata cara ngelaksanayang rerampagan manut kadi ring sor :
 - a. Sadurung ngemargiang rerampagan prajuru patut masadok ring sang pacang kerampag
 - b. Pemagi rerampagan, kemargiang olih Klian Adat, Prajuru Desa, kesarengin olih krama 10 diri pinaka saksi lan ngerombo I Klian
 - c. Sang ngerampeg mangda tanam tuwuh seakehnya manut ring utang sang kerampag

- d. Klian Desa Adat utawi prajuru miteketin sang kerampag mangda digelis nebus sadurung wenang palelangan
- e. Yan tan presida ketebus olih sang kerampag sejeroning waneng punika, padruwennya wenang kelelang
- f. Jinah palelangan punika keanggen nuku utangnya ring Desa lan prabiya rerampagan, sisane kewaliang ring sang kerampag
- g. Sane wenang kerampag barang rerampagan sane kebawos kesugihan
- h. Yening tan polih barang rerampagan utawi kealangan pemargin rerampagane olih sang kerampag wang inucap maka cihna tan nganutin Awig-Awig Desa Adat lan patitis Desa, lempas swadarmaning krama, wang inucap wenang kenorayang.
- i. Pamidanda sisip kadi ring ajeng presida purna yan sang sisip sampun :
 1. Matur piuning ring Klian Adat lan Kepala Dusun saha banten pejati ketaur ring Pura Desa
 2. Nunas geng sinampura ring Krama Desa
 3. Naur pamidanda luire Panca pamidanda

SARGA VII

NGUWAH-NGUWUHIN AWIG-AWIG

Pawos : 108

1. Nguwah-nguwuhin Awig-Awig patut kelaksanayang antuk paruman Desa Adat Anjingga. Kadulurin antuk “Utsaha Sabha Desa Adat Anjingan”
2. Perareman inucap patut melarapan gilik-saguluk paigum krama Desa
3. Pamutus bebawosan presida puput yan sampun kramane/prajurune gilik-saguluk utawi kengin mejalaran pasuaran (wewilangan suara)
4. Yan medasar wewilangan suara manut kadi ring sor :
 - a. Krama Desa Anjingan sane parum, sanistannya kalih paham sakeng sane tan rauh
 - b. Suara/wewilangan suara sanistannya kalih pahan sakeng sane sareng parum

SARGA VIII

PAMUPUT

Pawos : 109

1. Saluiring pemargi sane wenten ring Desa Adat Anjingan, sadurungne patut keanutang ring daging Awig-Awig puniki
2. Awig-Awig puniki kewastatin “Awig-Awig Desa Adat Anjingan
3. Awig-Awig Desa Adat puniki manggeh kalih kelaksanayang ring wewidangan Desa Adat Anjingan

4. Awig-Awig Desa Puniki, nganinin sehanan krama lan warga Desa Adat lan sehanan kakuwub Desa Adat Anjingan
5. Awig-Awig Desa Adat Puniki, kemargiang ngawit sakeng kereremin antuk krama Desa Adat Anjingan

Pawos : 110

Saluiring pemargi pakraman sane durung kebawos utawi manggah, sejeroning Awig-Awig piniki manggeh kelaksanayang mnut tata cara sane sampun ketah memargi (tan mimpas ring Peraturan Pemerintah Republik Indonesia, Keputusan Parisada miwah Lembaga Adat)

Pawos : 111

1. Klian adat kala ngemargiang sedaging Awig-Awig puniki miwah Usaha Sabha Desa Adat patut tan maren mawirasa ring sehanan prayogya sane taler ngawi wenang wang desane minekadi Kepala Desa, LMD, miwah LKMD
2. Awig-Awig piniki kelingga tanganin olih Klian Adat lan Penyarikan Desa Adat Anjingan maka cihna pamutusny
3. Kakukuhang olih Bapak Bupati Kepala Daerah Tingkat II Klungkung
4. Awig-Awig puniki keraremin duk rahina perareman Krama Desa Adat Anjingan ring rahina : Buda Paing Uye, Sasih Sada, Pangelong Ping 11/12 Saka 1908 Tanggal 4 Juni 1986.

Klian Adat (Bendesa Adat)
Anjingan.



(I NYOMAN MURTI)





Penyarikan Desa Adat
Anjingan.



(I NENGAH PUSPA)

BUPATI KEPALA DAERAH TINGKAT II
KLUNGKUNG.


(dr. TJOKORDE GDE AGUNG)